


अमेरिका

# मेना



# गेना

अंगिका प्रबन्ध काव्य

# गेना

अंगिका प्रबन्ध काव्य

अमरेन्द्र

प्रकाशक

समय साहित्य सम्मेलन

पुनसिया, भागलपुर (बिहार)

काव्य : गेना  
कवि : अमरेन्द्र  
प्रकाशक : समय साहित्य सम्मेलन, पुनसिया, भागलपुर (बिहार)  
सर्वाधिकार : कुमार संभव  
संस्करण : ई. १९९५  
मुद्रक : ऐक्यूरेट प्रिंटेर्स, भागलपुर  
दाम : २० टका

---

GENA (Poems) By : Dr. Amrendra

जीतू  
के अनन्त विछोह आरो चिर स्मृति में

## ई काव्य के बारे में—

बात अस्सी से शुरू होय छै । गेना केँ हम्में रोजे देखियै । खास करी केँ हटिया के दिन; हटिया केँ घामेँ घमजोर साफ करतेँ । एक रोज जेठ के दूपहरिया में हटिये साफ करतेँ गेना हमरा ऐतें देखी केँ रुकी गेलै—धुरदा के झोकोँ हमरोँ कपड़ा आरो देहों सेँ सट्टी जे जैतियै । ई घटना दू, एक रोजों में रहि-रहि केँ याद आविये जाय आरो हमरा याद छै कि जब ताँय केकरौ ई बात हम्में सुनाय नै दियै, ओकताहट हेनों बुझैतेँ रहै । मतुर हमरोँ ई बात केँ खाली प्राण मोहन बाबुए मौन लगाय केँ सुनै । की जानों—खग जानै खग की ही भाखा । हुनियो ई घटना सुनी केँ बाते बात में गेना रों ढेर-ढेर किस्सा सुनाय दै आरो फेनू कहै 'अमरेन्द्र बाबू एकरा पर एकठो कविता लिखों ।' हम्में कहियै कविता तेँ नै, एक कहानी कहियो जरूर लिखबै ।

बहुत दिनों के बाद कहानी के जग्घा में हम्में खड़ी बोली में गेना पर एगो छोटों रें कविता लिखलियै । ग्रीष्म खंड में शुरू सेँ ले केँ सोलहमों पंक्ति तक वही कविता छेकै, जेकरों हम्में अंगिका अनुवाद करी देलेँ छियै । आरो फेनू तीन बरस बाद शुरू होय वाला ई प्रबन्ध में एकरा राखै के, आरो शुरुवे में राखै के की मतलब हुएँ पारें ? शायत यही कि ई कविता हमरोँ एक अन्तेवासिनी केँ ऐतै पसन्द छेलै कि ओकरोँ ऊ खुशी सेँ जबेँ हम्में, आय गेना केँ सौंसे रूप में छपलों देखी के आपनों खुशी सेँ मिलान करै छियै, तें पहिलके भारी लागेँ लागै छै । जे भी हुएँ ।

बात आधों तेरासी के आसपास के या ओकरोँ बाद के छेकै । हम्में अंगिका रों सुकुमार कवित्त के कवि अनिल शंकर झा साथें सम्पादक केदार नाथ शर्मा रों आदमपुर वाला क्वाटर में कोय कामों सेँ गेलों छेलियै । सुनै, सुनाय रों शौकिन अनिल जी के कहला पर हम्में दुवे दिन पहिलेँ रचलों आपनों एगो

अंगिका कविता 'वर्षा-वर्णन' सुनैलियै, जे हू-ब-हू वर्षा-खंड मेँ हम्मं शुरुवे मेँ राखी देलें छियै, यानी पहिलों पंक्ति 'पानी सेँ ढलमल' सेँ ले केँ 'बेटी रोँ भीजै छै प्राण' तांय के पंक्ति । काफी सरहैलकै हुनी आरो फेनु अनिल जी के ही पूछला पर, "की ई कोनो खण्ड काव्य के अंश छेकै ?" हम्मं कहलियै—'नै'; बातो यही छेलै । मतुर तखनिये यहू मूँ सेँ निकललै—“बहुत बरसोँ सेँ सोची रहलौ छियै—गेना काव्य लिखै के, नै होलै तें ई वर्षा-वर्णन वही मेँ जोड़ी देवै ।” ई सुनी केँ अनिल जी ठठाय गेलौ छेलै । ई घटना के लगभग सात महीना बाद गेना केँ लिखबों शुरु भेलौ छेलै । आरो शुरु भेलै वही वर्षा-वर्णन सेँ । 'वर्षा-खण्ड' पूरा होला पर ही शुरु भेलै 'गर्मी खण्ड'; तब आरो जेना कि छै । मतुर जेन्हों कि हमरा याद छै, गेना लिखै में हम्मं शायते हफ्ता-हफ्ता भरी नागा करलें होवै आरो जहाँ तक कि ई काव्य के पूरा होय के बात छै, ऊ तें साल पचासी के महिना सितम्बर तांय ही भै गेलौ छेलै । मतुर ई अंत हमरों ओरी सेँ छेलै ।

नवासी के बात छेकै । गेना के कै एक खण्ड हम्मं सदाशिव सुगन्ध रों संकेत पावी केँ अंग्रेजी महिना के जनवरी अंक के 'श्रीरष कथा' में छापलियै, जेकरा पढ़ी केँ महाकवि पं. अवध भूषण मिश्र ने (भागलपुर रहै के दौरान) हमरा ई काव्य के बारे में कुछ आरो सुझैलकै । ऋतु-निर्णय ले केँ भी बात होलै । मतुर हुनकोँ बात केँ हम्मं ई कही केँ स्वीकार नै करेँ पारलियै कि हेनौँ हम्मं जानी केँ करलें छियै । फेनु हमरा सेँ ई काव्य के सर्ग के बारे में जानी केँ हुनी दू सर्ग आरो बढ़ाय दैलें कहलकै । हुनी चाहै छेलै—गेना रों बचपन भी आबी जाय आरो हम्मं सात सेँ ज्यादा बढ़ाय के पक्ष में नै छेलियै । 'बसन्त खण्ड' में तें गेना रों बचपन केँ हम्मं उतारिये चुकलौ छेलियै । मतुर पंडित जी रों बात हम्मं भूलें नै सकलियै । आधों फरवरी के शुरु सेँ 'जन्म-खण्ड' आरो यही महिना के अन्त होतें-होतें 'विपद-खण्ड' भी पूरा भै गेलै । खण्ड के अन्त भी कुछ हेनौँ ढंग से भेलै कि दुसरा केँ एकरों पीछू-आगू के पता नै चलें । हमरों दिली इच्छा एक्के रहै कि ई प्रबन्ध में सिरिफ छः खण्ड रहें, छः ऋतु के नामों पर, जेकरा में ऋतु के अनुसार नायिका रों विरह नै, गेना रों ऐठलौँ जिनगी के दुख दिखैलौँ जाय । मतुर 'नगर खण्ड' पहिलै सेँ जुड़ी चुकलौँ छेलै, से 'जन्म-खण्ड' आरो 'विपद-खण्ड' जोड़ै में हमरा ज्यादा सोचे लें नै लागलै ।

किताब रूपों में गेना के छपना भी नवासी के जनवरी से ही प्रारम्भ भै गेलौ छेलै, मतुर ई पूरा-पूरा छपी केँ निकलें पारी रैल्लों छै नब्बे के चैत-बैशाख में । जोँ काव्य में शुरु के दू खण्ड नै जुटतियै, तें ई काव्य भी चैत-बैशाख सेँ ही शुरु होतियै—बड़ा कष्ट दै वाला दिन । गेनाहौँ केँ ई प्रकाशित रूपों तक लाने में हमरा

हेने दिन के दुखों के बीचों से गुजरै लें लागलें छै; मतुर सदाशिव सुगन्ध रो बल्लो तें यहें दिनों में खूब मिललें छै ।

चाहै जौन ढंग से भेलों हुएँ, ई काव्य शुरू करै वक्ती हम्मं केन्हौं कें नै सौचलें छेलियै कि जौन गेना कें हम्मं उठाय रहलें छियै, ऊ ऋतु में तें की, महाकाव्य में भी नै समाबें पारें । ऊ तें बामन रों पता हमरा तबें चललै, जबें ओकरो डेग उठलै आरो हम्मं ऊ चित्र कें उतारै के असमर्थता में , ऊ सब खाली आपनों मनो में गोछियाय-गोछियाय कें राखी लेलें छियै—सामरथ भेतै तें लिखबै ।

बहुत कुछ के बादो, ई काव्य नवासिये के अन्त ताँय निकली गेलों रहैलियै, मतुर यही बीचों में हठात भयानक दंगा से दानी कर्ण आरो बासू पूज्य रों स्पर्श से निर्मल भेलों अंग देश उतरी पिन्हलें एक हेनों आदमी नाँखी दिखाबें लागलै, जेकरो सामने में ओकरो माय-बाप, बेटा, पतोहू आरो भभोहू सभ्भे जललें छेलै । हम्मं चुपचाप आपनों कोठरी में गेना के पांडुलिपि निकाली-निकाली ओकरो 'नगर-खण्ड' कें उठी-बैठी कें पढ़तें रहियै,

“लड़ै के छेकै गरीबी सेँ, लड़तै नै  
अच्छा जे रस्ता छै ओकरा पर बड़तै नै  
लड़ै के छेकै मनुखों के दुश्मन सेँ  
लड़ै छै कुरमी से, कैथो सेँ, बाभन सेँ  
“आपने नै चेत तबें लोगें लड़तै नै  
उच्चो-अछूतो के खोड़ा पढ़तै नै  
लड़ै, तें हमरा की ? लेकिन है लड़ला सेँ  
राकस के रस्ता पर जानी कें बड़ला सेँ  
होतै की? लड़तै सब, लोगो के नाश होतै  
घरती पर भूतो-पिचासो के बास होतै  
लोगो के रहतै बस एक्के कहानी ही  
लागतै बुझव्वल रँ एकदम पिहानी ही  
“घरो में बाघो के, बानर के बास होतै  
मन्दिर में देवो ठाँ राकस के रास होतै  
होतै तें हमरा की ? हमरो के मानै छै ?  
कथी लें उच्चो-अछूतो कें ध्यानै छै ?  
ध्यानौ, तें हमरा की ! लेकिन है ध्यानला सेँ  
लोगे के लोगो में भेदभाव मानला सेँ  
लड़थैं ही रहतै सब आरो गरीबी ई



जाबेँ नै पारें छै केन्हों केँ आभी ई  
“राजा तें चाहतै छै, लड़ौ कोय बात लै  
मुँहों में धरमों केँ, माथा में जात लै”

आरो ई सोची केँ मॉन बड़ी कलपित्तों होय उठै कि चौरासी में जे बात  
गेना सोचलकै, ऊ नवासी के अन्त होतें-होतें घटी गेलै । आचरज भी हुऐ । की  
गेना एत्तें बड़ों भविष्यवक्ता ? केना केँ गेना देखी लेलकै ई सब ? की वैं ई  
सचमुचे में जानी लेलें छेलै कि राजा सेँ लेकेँ देव-पित्तर तक सब आपने रँ वास्ते  
सोचै छै, बड़के वास्तें । छोटका के ई सब कोय नै । आरो हम्में सचमुचे में  
तखनी मतरछिमतों हेनों करै लागियै, ई सोची केँ कि केन्हें नी गेना नेँ कबीर  
नाँखी चौक-चौराहा पर घूती-घूमी केँ यही आपनों बात तखनिये कहना शुरू  
करलकै ? जे काम बाद में ई काव्य के अन्तिम अंश में हुऐ छै । एकरों दुख  
बनले रहतै ।

आरो आखिर में यही कही केँ रुकै लें चाहै छियै कि ‘बसंत खंड’ के  
हरिगीतिका वाला अंश भी नवासी के पझैतें सारा पर खाड़ों होय केँ भविष्य के  
शांति हेतु करलें गेलों शान्ति-पाठ नाँखी ही छेकै । ई अंश ये वास्ते भी जोड़ना  
जरूरी भै गेलों छेलै कि निर्दोष मिलन के घोर सुखद बेलाहौ में गेना खाली भीतरे  
भीतर भीगें, ‘आरो कुछ नै बोलें, तें ई अन्त कतेँ छुछुम लागतियै ।

ई बात हमरा तभियो लागै, जेना केँ अइयो, कि ई सब होला के बादो  
जेना कुछ बची गेलै, कहै लें । मतुर सब लोभों केँ रोकतें हुऐ, हम्में नै खाली  
राहुल नाँखी गेना केँ ही पाठक रों संघ में दै रहलें छियै, बलुक अपना केँ भी  
कुछू समर्थ करै वास्ते, सोची-समझी केँ, वही संघों में दै रहलें छियै, ई कहतें हुऐ  
‘संघं शरणं गच्छामि ।’

—अमरेन्द्र

शुक्लपक्ष, बैशाख, त्रियोदशी  
(सन् १० ई.)

हिन्दी विभाग  
सी. एन. डी. कॉलेज  
बाँसी, भागलपुर

## सर्ग-सूची :

- पहलौ सर्ग (जन्म-खण्ड) ११  
दूसरौ सर्ग (विपद-खण्ड) १४  
तेसरौ सर्ग (ग्रीष्म-खण्ड) १८  
चौथौ सर्ग (वर्षा-खण्ड) २४  
पाँचमौ सर्ग (शरत-खण्ड) २६  
छठमौ सर्ग (शिशिर-खण्ड) ३५  
सातमौ सर्ग (नगर-खण्ड) ४३  
आठमौ सर्ग (पतझड़-खण्ड) ५८  
नवमौ सर्ग (वसन्त-खण्ड) ६६

## जन्म-खण्ड

जों बसन्त में गाछी के ठारी सेँ निकलै टूसा  
चतुरदशी के बाद सरँग में विहँसै चान समूचा  
बितला शैशव पर जों आबै मारलेँ जोर जुआनी  
जेठों के सुखलों चानन में जों भादों के पानी

जिना जुआनी के ऐला पर आबै लाज-शरम छै  
लाज-उमिर के ऐथें युवतीं पाबै पिया परम छै  
पिया परम के पैथें जेना सुध-बुध खोय छै नारी  
ढोतेँ बनै नै केन्हौँ ओकरा सुख के बोझों भारी

जेना सौनों में पछिया के उठथें चलै झकासों  
बेली के खिलथें गंधों रोँ ठाँव-ठाँव पर बासों  
जों समाधि के लगथें अजगुत सुख केँ पाबै तपसी  
तपला घरती के बादों में जेना आबै झकसी  
आय वहेँ रँ कादर-पट्टी झूमै झन-झन बाजै  
डलिया-सुपती-मौनी-थरिया किसिम-किसिम के साजै  
बरस-बरस के बितला पर लपकी बनलों छै माय  
सौंसे पट्टी रोँ मौगी सब गेलों छै उधियाय

करका, कच्चा माँटी रोँ बुतरू रँ बुतरू भेलै  
भोज-भात के नेतों-पानी द्वारे-द्वार बिल्हैलै

गोबर के पानी में घोंघी द्वार-भीत पर लीपै  
कोय एंगन के मिट्टी के धुरमुस से लै के पीटे

छपरी के छौनी होलो छै नया डमोलो लै के  
लपकी रो मरदाना खुश छै बाप पूत रो भै के  
करिया-करिया छौड़ी-छौड़ा कादर रो हुलसै छै  
देखी के लपकी रो मरदाना के दुख झुलसै छै

गीत-नाद के कंठो पर की टन-टन टीन टनक्का  
काँसा के थरिया पर बाजै झन-झन-झनक झनक्का  
बहुत दिनों के बाद कदरसी अजगुत करै छै खेल  
टोला भर रो मौगी के माथा पर देखलौं तेल

देखी-देखी गोद रो बच्चा लपकी हेनो विभोर  
आशिष दै छै खनै-खनै में; इस्थिर रहै नै ठोर  
मूँ के चूमै, गाल के चूमे, माथा चूमै लपकी  
सुतलो ममता हिरदय के हेनो उठलो छै भभकी

देखै ते देखै में पिपनी सुय्यो भरी हिलै नै  
देर-देर तांय पोल बेचारा अलगे रहै, मिलै नै  
छूवै छै गुदगुदो तरत्थी, देह-तलवा के छूवै  
बुतरू बदला मय्ये के गुदगुदी बदन में हूवै

आरो कभी झुकी के अपनो सीना में लै-लै छै  
पोखरी पर जो सांझ झुकी के कमल हृदय में राखै  
जत्ते कि लेरुआ देखी नै गय्यो कभी पन्हाय छै  
दूध बही के साड़ी के सरगद्दो करले जाय छै

घर-घर पीछू लपकी रो बस भाग सरहैलो गेलै  
कारो पत्थर के पुतला रँगेना गोद में खेलै

कल्लेँ दिन ताँय गीत-नाद के भेलै धूम-तमाशा  
लपकी रोँ दरवाजा सब रोँ बनले रहलै बासा

बहुत दिनों ताँय बुतरू-उतरू चुनमुन शोर मचैलकै  
कोय बोकटों कोय कोबों भर लै धुरदा मिली उड़ैलकै  
रात-रात भर लपकी रोँ घर होतें रल्लै इंजोर  
दीखै दम्पति केँ दुनियाँ एकदम हरा कचोर

बाप बनै छै घोड़ा, बैठी गेना टिकटिक बोलै  
माय रोँ गोड़ों के झुलवा पर ऊपर-नीचेँ झूलै  
बढ़लौ गेलै माय-बाप रोँ हँसी-खुशी संग गेना  
बीस बरस रोँ भेलै कहिया, केकरौ ज्ञात नै केना ।

## विपद-खंड

धरती पर के कवि जनमलै ? केकरा साहस पास  
बड़ा कठिन छै सबटा लिखना गेना रौ इतिहास  
गिनना की केकरौ सेँ सम्भव छै चानन के बालू  
गेना रौ दुख कहला सेँ पहिले सट्टै छै तालू  
कलम उठैथें कानेँ लागै पापहरणी के पानी  
दरकें लागै भुइयाँ-भुइयाँ सुनथें करुण कहानी  
हुहुआबेँ लागै छै दुख सेँ हवौ तुरत उनचास  
कपसी-कपसी कानेँ लागै धरती संग आकाश  
गेना रौ दुख हेन्हे छै कि सुनथें धर्य छुटै छै  
माय रौ छाती की फटलै, मंदारो जाय फटै छै  
सृष्टि बड़ी हेरैलोँ लागै, चेहरा करुण उदास  
बड़ा कठिन छै सबटा लिखना गेना रौ इतिहास  
बीस बरस रौ होथें गेना हेनोँ ओझरैलै कि  
सूतो नै ओझराबै । सोचै—जिनगी भेलै ई की !  
इक्कीसो नै गेलोँ होतै, गेलै सुख सब मौज  
गेना रौ जिनगी के गढ़ केँ तोड़ै दुख रौ फौज  
जेठ-दुपहरिया के दिन छेलै जंगल मेँ जखनी कि  
बाबू लकड़ी काटै छेलै, बाघें लेलकै लपकी  
गूँजै छै कानोँ मेँ अभियो बाबू-माय रौ शोर  
गेना रौ जिनगी मेँ दुकलै विपद बनी केँ चोर

जगह-जगह में सेंध लगैनें दुख सब दुकले गेलै  
मिली-जुली दुख गेना केँ छै गेंद बनाय केँ खेलै  
बाबू के मरथें मय्यो रोँ हालत बड़ी विचित्र  
घंटा-घंटा भर भीती पर लिखलोँ लागै चित्र  
कभी कहै छै, 'दौड़ें बेटा, बाघ उतरलोँ छौ रे  
जो-जो रे बीजुवन बेटा, बाप गेलोँ छौ भोरे  
'तोहरो बाबू रे बेटा नेहोँ रोँ अजगुत खान  
हमरोँ सुख नै देखलोँ गेलै, दुष्ट भेलौ भगवान'  
कुछ-सेँ-कुछ फदकै, बोलै छै, हालत बड़ी विचित्र  
घंटा-घंटा भर भीती पर लिखलोँ लागै चित्र  
ठाँय-ठाँय ठोकै चोखटी सेँ घुरी-घुरी माथोँ केँ  
लपकीं छाती पर पटकै छै पीटनेँ रँ हाथोँ केँ  
दौड़ी केँ गेना रोँ गल्ला सेँ लिपटै छै माय  
दुख सेँ चीखै रही-रही केँ; जोँ, रम्भाबै गाय  
गुदड़ी-गुदड़ी करी लेलें छै चेथरी-चेथरी साड़ी  
चूल नोची केँ धामिन लागै; आँख निरासै फाड़ी  
सौ विधवा रँ असकल्ले ही माय कानै छै, कुहरै  
गेना रोँ आँसू ई देखी-देखी छलछल टघरै  
कभी कहै छै, "प्राण जरै रे, बेटा सुलगौ देह !"  
कटलोँ पाठा रँ तड़पै छै, करै दर्द सेँ "एह !"  
"सुन्नोँ-सुन्नोँ लागै रे संसार वृथा श्मशान  
सारा दही सजाय रे हमरोँ कोखी के सन्तान  
"हमरे पाप विषैलौ बेटा, बाघें खेलकौ बाबू  
जहर खिलाय केँ मारी दे रे, जीतोँ हम्मेँ आभू !"  
टोला भर रोँ जोर जनानी कस्सी पकड़ै माय  
लेकिन कसलोँ मुठ्ठी सेँ मछली रँ छिलकी जाय  
पाँच बरस तक हेनै बितलै, कब ताँय आखिर जीतयै ?  
चेथरी-चेथरी चुनरी केँ सूर्योँ सेँ बैठी सितयै ?  
भोर उठी रहलोँ छेलै, लपकी रोँ साँझ उतरलै  
गेना-जिनगी मेँ जेठोँ के धूप दुपहरिया भरलै

पाँच बरिस के जैथें आरो बचलो सुख टा गेलै  
 मिली-जुली दुख गेना केँ छै गेंद बनाय केँ खेलै  
 माय-बाबू रों मरथें गोतियां चरकठिया लै लेलकै  
 जनम-जनम लें वनवासी रामे रँ ओकरा कैलकै  
 दाना-दाना लेली बिलठै, हट्टो-हट्टो हूवै  
 अन्तर जेना-जेना धधकै, बाहर आँखो चूवै  
 कोय दुआरी पर नै आबै दै—अछूत जानी केँ  
 जरो छुवैला पर लागै दू हाथ बड़ा हानी केँ  
 बहुत विधाता निष्ठुर होय छै—जल्लादे रँ क्रूर  
 जे निर्दोष, करै छै ओकरै थोकची-थोकची चूर  
 एक साथ टूअर पर विधि रों विपदा-भूख-पियास  
 बड़ा कठिन छै सबटा लिखना गेना रों इतिहास  
 हरदम लागै छै ओकरा बस आबेँ हेने जेना  
 कंठोँ में लसकी गेलोँ छै प्राण; गुजरतै गेना  
 कभी-कभी खुट्टा के बकरी जोरलोँ बाघ दिखाबै  
 खनै-खनै लागै छै ओकरा 'बाबू-मांय' बुलाबै  
 कपसै छै भीती सेँ सट्टी, कोन्टा में छै कानै  
 जिनगी के नद्दी सेँ दुक्खे-दुख रों बोचोँ छानै  
 छुटलै साथ स्नेहोँ के तेँ साथी-संग भी छुटलै  
 एक 'दुलारी' छेलै ऊ भी केकरो सेँ जाय जुटलै  
 दुख रों एक अकेल्लोँ साथी वहू आँख सेँ दूर  
 पर्वत सेँ पत्थर पर गिरलोँ मन छै चकनाचूर  
 टुक-टुक ताकै दिन-दिन भर छै, रात-रात भर हैरै  
 यै पर डोरी मिरतूँ-जिनगीं फेरा-फेरी फेरै  
 साल-साल भर देतें रहलै सोच-फिकिर के हूल  
 जिनगी सालै गेना केँ जेहनों कुन्ती रों भूल  
 साल-साल भर दुख सेँ होलै ओकरोँ आँखमिचौनी  
 साल-साल भर देह-दंश नें कैलकै ओकरोँ दौनी  
 आँख भी दुक्खै, कमर भी दुक्खै, गोड़-हाथ सब दुक्खै  
 लोर आँख सेँ जत्तेँ टघरै, ओतनै ठोर छै सुक्खै



बैठलों-बैठलों देहरी पर घन्टा-घन्टा भर सोचै  
चिन्ता सेँ अँगुरी देहोँ मेँ गालोँ मेँ छै कोचै  
सोचै छै, “जिनगी रोँ बाकी समय केना केँ कटतै  
की कादोँ-कीचड़ के हरलै पर हमरो दुख हटतै  
“कर्म के की दोष सही मेँ ? की समाज के खेला  
की कूड़े-ककट मेँ छिपलोँ हमरोँ भाग अधेला  
“जोँ हेने छै, तेँ दुख की छै ।” गेना मन मेँ सोचै  
आपनों तीस बरस रोँ वय केँ गाली दै-दै कोसै  
की जानै छै जिनगी मेँ गेना-की छेकै सुक्ख  
तीस बरस रोँ ऊ जोँ छै, तेँ साठ बरस रोँ दुक्ख  
बाहर-भीतर सेँ चललोँ छै यै पर ऐतनैँ चक्र  
छेलै नै, पर बनी गेलोँ छै छिनमान अष्टावक्र ।

## ग्रीष्म खण्ड

आपनों नाटोँ कद रों देहों के डगमग रँ चाल  
चल्लोँ जाय छै गेना मन मेँ लेलेँ बहुत मलाल  
बहुत पुरानों धोती बान्हलेँ, कसलोँ जेना लँगोट  
गेना के जिनगी छै; जेना, सर पर लागलोँ चोट  
करलेँ ऐलोँ छै गन्दा चीजोँ सेँ येँ तकरार  
बौंसी के गेना लागै छै; वामन के अवतार  
लिबिर-लिबिर आँख, गोल चेहरा, अनगढ़लोँ रँ देह  
देहों सेँ अर्जुन बनलोँ छै; मन सेँ वही विदेह  
आगू नाथ नै पीछू पगहा, केकरोँ होतै मोह  
बिनडोबों रँ भटकै छै, दुनियाँ ओकरोँ लेँ खोह  
भले जेठ के बरसेँ आगिन, पूस-माघ रों जाड़  
मंद्राचल रँ सबसेँ झगड़ै छै गेना रों हाड़  
विष्णु केरोँ वरन । भाग विष्णु के कहाँ छै एकरोँ  
गूहों-मूतों केँ घीकी रहलोँ छै केकरोँ-केकरोँ  
लरपच सौंसे देह, टधै छै, पर चल्ले ही जाय छै  
बौंसी भले सुहाबेँ हरदम; कखनू कहाँ सुहाय छै  
लेलेँ छै दाँया हाथों मेँ बोढ़नी केँ, छोटों टा  
जिना उखाड़ी लेलेँ रँहै मैले के झोंटों टा  
खोजी रहलोँ छै, कन्ने पड़लोँ छै कूड़ा-ककट  
साफ अभी होय केँ रहतै—नाली-हटिया रों पर्पट

“दू दिन के गूहों-मूतों के सब्भे ठियाँ टघार  
 भगमानो के भूमि के सुलगै छै हेन्हें कपार  
 “के नै जानै छै बौसी भगमाने रो घर छेकै  
 या आपनो आँखी से नै भगमान मसूदन देखै”  
 “केकरा है मालूम नै छै कि सागर जबे मथैलै  
 मनराचल के मथनी से लक्ष्मी तक निकली ऐलै”  
 “सौ-सौ रतन, चनरमा, अमरित, मंदराचल के कारण  
 जेकरा बौसी हिरदय पर करलौ छै सौसे धारण  
 “देखथें लगै, समुन्दर मे ज्यों उठलौ रेंहें डेहों  
 या धरती पर एक्के ठियाँ उतरलौ रेंहें मेहों  
 “के नै जानै छै है कि भगमानो के कानों से  
 जे होलै, मारै ले दौड़लै हुनकै ही जानों से  
 “सौ बरसो तक चलथें रहलै युद्ध बड़ा ही भारी  
 राकस के आखिर मे देलकै भगमाने नै मारी  
 “पंडा जी बोलै छै—तेंबे यही पहाड़ उठैलकै  
 आरो ओकरो माथो पर भगमाने राखी देलकै  
 “लेकिन यहू समैलो छेलै मन मे एक ठो डोर  
 बाहर निकली युद्ध करे नै लागे ओकरो धोर  
 “यै लेली पर्वत पर अपनो गोड़ धरी के ऊपर  
 बैठी रहलै । राकस अभियो भी दबलौ छै भू पर  
 “अभियो भी पर्वत पर बैठलौ होलौ छै भगवान  
 जे जोगी छै, देखै छै । सबके होते की ज्ञान’  
 “जे नगरी मे इन्दर जी रो कष्ट दूर भै गेलै  
 जे नगरी मे सीता के संग राम ठहरलौ छेलै  
 “ऊ नगरी के दुरगत देखों, मैला हिन्ने-हुन्ने  
 गोड़ बचैते निकलौ तोहों, जाय लें चाहों जन्ने  
 “आबे नगरी के लागों के लीला अपरम्पार  
 देहरी से सड़कों तक टघरै छै मूतों के धार  
 “जे धरती रामों के गोड़ों से कंचन भेलौ छै  
 जे, सीता पाबी के, आँखी रो अंजन भेलौ छै

“रिखी-मुनी रों धरती, एकरा जेकरो बड़ा गुमान  
 ऊ बौसी के भाँसों-औकतों से छलनी छै प्रान  
 “कोय नै सोचै छै एकरो लें जरियो कभी नै कचोट  
 एक एकल्ले गेना ही भोगै लें एकरों चोट  
 “जब तक गेना जिन्दा छै बौसी के खूब घिनाबों  
 सोना रँ बौसी के गोबर-गू रों ढेर बनाबों  
 “बौसी रों सम्मान-मान लें के सोचै छै आवें  
 के बैठलों छै सुनबै लें ? कोय, केकरा जाय सुनाबें  
 “हमरो कहला से कौनो तें मानतै हमरो बात  
 देहो के संग दैवें नै देलें छै छोटों जात  
 “छोटों जात, बुझै छै जेकरा बड़ों-बडुक्का लोग  
 भरी जुआनी में जेना कि होलों भारी रोग  
 “हमरा की लेना छै ई से, जौनें जना बोहाबौ  
 कोय कूड़ा से ठेंसी उल्टौ; कोय देखी मुस्काबौ  
 “आपनों-आपनों धरम निभाबौ, आपनों धरम निभाय छी  
 पूर्व जनम रों कर्मों के फल लिखलो जे छै, पाय छी  
 “हमरा की ? हममें तें हेने कूड़ा-ककर्ट ढोतें  
 या ई मिट्टी के किस्मत देखी के रोतें-रोतें  
 “कोय दिन एकरो धुरधा में धुरधाहै बनी समैबों  
 या ई मिट्टी पर तन तेजी सरंगों के सुख पैबों  
 “जे मिट्टी पर कामधेनू रों किरपा राज करै छै  
 एकरों कुंडो, पापहरणी में पुन्ने-पुन्न फरै छै  
 “महाकाल भैरव रों जे धरती बनलों छै आसन  
 जेकरो सम्मुख हाथ जोड़ी के खाड़ो छै इनरासन  
 “पर्वत के खोहों में शोभै छै नरसिंह भगवान  
 जहाँ पहुँचतैं हाथ लगै छै मुक्ति के वरदान  
 “लखदीपा के भद्रासन, पर्वत के ऊपर खोह  
 जोगी शिव रों तपोभूमि, जे व्यास मुनि रों मोह  
 “जे धरती पर वासुपूज्य के मिललो छै निरवान  
 जहाँ बिराजै छै मधुसूदन साक्छात भगवान

“ऊ मिट्टी में जखनी हमरो पापी प्राण समैतै  
 ठोकर दै देबै तखनी जों सरंगों लै ले ऐतै’  
 “एक्के किंछा हमरो जिनगी में छै, जे नै पुरलै,  
 मरलौ पर देखीं हम्में कि आबे ऊ दिन घुरलै  
 “हवा उड़ाय के हमरा हिन्ने-हुन्ने जाय छिरयैतै  
 सौंसे बौंसी में हमरो छोटो टा देह समैतै’  
 “धूल बनी के हम्में ई धरती पर लोटी रहलौं  
 खुब्बे सुक्खो के जिनगी मौजों से काटी रहलौं  
 ई सोची के गेना रो मूँ हेनो झलकी ऐलै  
 चेहरा से गुस्सा-दुक्खो रो सबटा भाव बिलैलै  
 एक बार सिहरी उठलै ऊपर से नीचे गेना  
 देहो में गुदगुदी अचोके कोय लगाबै जेना  
 ठोरो पर नाँचे लागलै कठपुतली रँ मुस्कान  
 बौंसी में जनमै के ओकरो बढ़ले गेलै गुमान  
 मन-मन सोचे लागलै ‘जे भी हुएँ, मतुर नै होतै  
 हमरो रहतें कूड़ा के ढेरी पर बौंसी सोतै  
 “गुलगुलैन रँ लागे जेकरो मातृभूमि, ऊ नर की  
 भूतों के डेरा जे बनलौ छै, ऊ घर भी घर की  
 “आग लगौ हेनो जिनगी के, जेकरो मिट्टी-देश  
 वन-वन नाचे सबरो बीचों में, धामिन रो भेष’  
 सोची के ई गेना बोढ़नी हानी चलाबे लगलै  
 जाने ऊ देहो में एतना जोर कहाँ से जगलै  
 गेना आपनो हाथो से जन्ने भी जोर लगाय छै  
 औकते-भाँसो बिन्डोबो रँ ऊपर उठलो जाय छै  
 दाँया-बाँया हाथ चलै छै ओकरो एत्ते रन-रन  
 जेनाकि लट्टू धरती पर घूमते रहें हन-हन  
 घामे लागले देह, पसीना से लथपथ छै गेना  
 सरगद होय रहलौ छेलै; बरसा से भीगी जेना  
 छर-छर चूएँ लागलै ओकरो सौंसे देह से घाम  
 एतहौ पर, हाथो पर ओकरा आय छै कहाँ लगाम

लागै छै आयकों बादों सेँ कूड़ा-कर्कट, कादों  
 कहीं दिखैतै नेँ बौंसी मेँ, अइये दिखै छै आधों  
 बोढ़लों धरती, घामों सेँ भिंजलों लागै छै हेनों  
 पूजा वास्तें नीपलों-पोतलों ऐंगने रेंहेँ जेन्हों  
 होड़ चली रहलोँ छै गेना आरो तमतम लू मेँ  
 के जानेँ कि जीत केकरोँ आय होतै ई दू मेँ  
 धूप छेकै या खौल्लोँ पानी या नरभक्षी बाघिन  
 या ऊपरों सेँ बरसै छै टोकरी के टोकरी आगिन  
 हों-हों गरम हवा सेँ हू-हू होय रहलोँ छै शोर  
 पीठ जरी रहलों छै गेना रोँ सूखै छै ठोर  
 बढ़ले जाय छै रौद, सुरुज माथोँ पर चढ़लोँ आबै  
 भाँती मेँ तपलों लोहों के गेन्दे रँ दिखलाबै  
 चौधियाबै छै आँख, मुँदी ई जाय छै अपने आप  
 धूप छेकै या बुतरू के गालोँ पर कसलोँ थाप  
 एक्को ठो लोगोँ रोँ कन्हों दरस दिखाबै छै की  
 गल्ली-कुच्ची, बहियारी मेँ आबै-जाबै छै की  
 बिन मनुक्ख रोँ बौंसी तेँ श्मशान दिखाबै छै  
 गेना छेकै ? या शिव जी ही धुनी रमाबै छै  
 सब नुकलोँ छै घर मेँ; जेना, पुलिस-डरोँ सेँ चोर  
 बाहर नादिर नाँखी रौंदैँ जुलुम करै घनघोर  
 एक बार तड़पी उठलै रौदी सेँ हेने गेना  
 छोड़ धिपाय केँ दागी देलेँ रेंहेँ ओकरा जेना  
 लेकिन फेरू कामोँ मेँ तन-मन सेँ लागी गेलै  
 आग सुरुज के ओतनै ओकरौ मेँ भी जागी गेलै  
 हाथ चलेँ लगलै दायँ-बायँ मेँ ओकरोँ रन-रन  
 जेना कि लट्टू धरती पर घूमतेँ रहेँ हन-हन  
 आगिन पर चढ़लोँ खपड़ी रँ धरती तपतेँ रहलै  
 गोड़ गेना के जेकरा पर लाबा रँ फुटतेँ रहलै  
 ई देखै लेँ बाहर छै ताड़ोँ पर खाली गिद्ध  
 एकदम इस्थिर आँख, जरा मुँदलोँ, औघड़ रँ सिद्ध

बीच-बीच में गरमी से चिकरी उठ्ठै छै हेनों  
पूत मरै पर बेहोसी में माय चिहाबै जेहनों  
ई तपासलो दिन में अनचोके ही जैतै जान  
ठारी पर बैठलो कौआ के हक-हक करते प्राण  
तहियो बोढ़नी पर नाँचै गेना रो अँगुरी गिन-गिन  
ऊपर से बरसी रहलो छै टोकरी-टोकरी आगिन  
आखिर थक्की के सुरुजो पच्छिम में डूबी गेलै  
रँग सुनहला किरनों के गेना रो मूँ पर खेलै ।

## वर्षा खण्ड

पानी सेँ ढलमल मेघों के सरँगों में बारात  
सूरज देव बिलैलै हेनोँ दिन्हो लगै छै रात  
मेघ छिकै या कारों-कारों राकस करै छै खेल  
बिजुरी नेँ ई, दाँत छिकै राकस के । मिलै छै मेल  
करिया मेघों रोँ बीचों में बिजुरी लागै केहनों  
कोय सिलोटी पर टेढ़ोँ रेखा खिचलेँ छै जेहनों  
कभी झाकसों, कभी तेँ बूँदा-बूँदी के अठखेल  
देखलेँ छेलियै हेनोँ नै धरती-सरँगों के मेल  
बिजुरी केरोँ मशाल जलैनेँ, ठनका-तुरही साथ  
बूँदा-बूँदी-झाकसों-अन्धड़-पानी के बारात  
आय सरँग शिव हेनोँ लागै—जटा बिखरलोँ छै  
फूले लाबा, आय धरती रोँ खोचा भरलोँ छै  
बाप बनी केँ सरँग करै छै पहलोँ कन्यादान  
नेहोँ के लोरोँ सेँ बेटी रोँ भीजे छै प्राण  
हू-हू हवा चलै छै केहनों गाछ डोलैनेँ-झाड़नेँ  
ओकरो जोँड़ उखाड़नेँ जौनेँ भीतर छेलै गाड़नेँ  
पछिया के झोंकोँ सेँ लम्बा गाछ हिलै छै हेनोँ  
निसां चढ़ैनेँ आरी-बारी लोग झुमै छै जेहनों  
भाव उतरला पर जेना कि भगत चलै छै चाल  
लम्बा गाछों के होय रहलोँ छै होने कुछ हाल



पछुवा हूकै, पुरबा हूकै, गाछी केरौं निनौन  
 आपनो रीस उतारी रहलो छै जेना कि सौन  
 कत्ते देर बरसलै तभिये रुकलै जाय के मेघ  
 पर धरती पर पानी के की कहीं मिलै छै थेग  
 सर-सर, छप-छप, हो-हो पानी के बहलो छै धार  
 उभचुभ करै छै छोटका गाछ; तें डुबलो खेत-पतार  
 ठारी बीच नुकैलो-भीजलो झाड़ै डैना काक  
 फुदकी-फुदकी दीएँ लागलै काँव-काँव के डाक  
 की बोलै छै ? मेघ थमै के सबके कहै सनेश  
 आकि वियोगिन के सुख दै छै, जेकरो पिया विदेश  
 पाँख खुजाबै छै लोली से ठहरी-ठहरी के  
 पानी कभी उड़ाय छै ऊपर पंख पसारी के  
 पत्ता पर पत्ता से टप-टप बूंद चुवी रहलो छै  
 रुकी-रुकी के उतरै लें जों कोय सिखी रहलो छै  
 गाछ लगै छै, मली-मली के जना नहैलें हूवें  
 बूंद; जना, पत्ता रो लट्टो से ससरी के चूवें  
 बरसा थमी गेलो छै लेकिन ठनका ते ठनकै छै  
 बाहर जाय से मॉन डरै छै, दोनों गोड़ रुकै छै  
 गेना ने ओसरा पर से ऐंगन के ओर देखलकै  
 आँख भरी ऐलै ओकरो; हाथो से लोर पोछलकै  
 पोखर बनी गेलो छै ऐंगन, देहरी भँसी गेलो छै  
 परछल्ली नीचे छै टुटलो, भीतो धँसी गेलो छै  
 खोर बची रहलो छै छपरी पर कहीं-कहीं पर  
 चूला से पानी के फोका होय छै वहीं-वहीं पर  
 ऐंगना दोनों ओर देहरी लागै नदी रो पाटो  
 गेना तड़पी उठलै, खाय के कोय जना कि साटो  
 लोर चुवी के गालो तक आबी के ठहरी गेलै  
 मिरतू से झगड़ै मे जिनीगी फेरू हारी गेलै  
 बाहर बरसा थमी गेलो छै, ठनको रुकी गेलो छै  
 माथो तेज हवा रो धीरे-धीरे झुकी गेलो छै

लेकिन गेना रों आँखी सेँ झोंड़ पड़ी रहलो छै  
हिरदय में दुखों रों झोंका तेज बही रहलो छै  
हुमड़े छै फटलो छाती—देखी केँ भीत भसकलों  
बचलो पुरबारी छपरी सेँ भी कुछ खोर खसकलों  
पट-पट केँरेँ लगलै कानै लेँ दोनों ठो ठोर  
टप-टप चूवेँ लगलै आँखी सेँ गेना रों लोर  
आँख मुनी केँ बैठी गेलै माथों पर लै हाथ  
गेना केँ समझै में नै आबै छै विधि रों बात  
“जे गरीब छै ओकरै पर कैहिनै ई जुलुम हुवै छै  
जेकरोँ आँख चुवै छै, ओकरे छपरी केना चुवै छै  
“की बिगाड़लेँ छै भगवानों के गरीब नेँ हाय  
रहै आपनों जिनगी खाय केँ, जिनगी एकरा खाय  
“केकरा कहै छै सुखों रों दिन, की चैनों रों रात  
हमें तेँ एक्के जानै छी बस दुखों रों बात  
“दुखे साथी, दुखे बाबू, दुखे हमरोँ माय  
दुखे आगू-पीछू डोलै, दुखे एक सहाय  
“जानेँ कहिया देखबों आँखी सेँ सुखों रों दिन  
जिनगी हेने लागै, जे रँ गड़ी गेलोँ छै पिन  
“रात कटै छै परलय नाँखी, दिन भी जना कभात  
एकदम गूरे नाँखी टहकै छै गरीब रों जात”  
“छटपट-छटपट केँरेँ हेनोँ सुतला में, जगला पर  
जिन्दा झोंकी देलेँ रेँहेँ कोय जरलोँ सारा पर  
“लोग कहै छै जेकरोँ कोय नै, ओकरोँ छै भगवान  
कहाँ नुकैलोँ छै इखनी, कैहिनै नी दै छै ध्यान  
“पंडा जी तेँ बोलै छेलै—इन्दर जे गुस्सैलै  
सौँसे वृन्दावन में पानी सागर जकां समैलै  
“अलबल केँरेँ लागलै बच्चा, बूढ़ों, जोँर-जनानी  
गोबरधन लै लेलकै अँगुरी पर रोकै लेँ पानी  
“इखनी कैहिनै नी आबै; हम्मू तेँ संकट में छी  
की भगतान बड़ों केँ ही चाहै छै बीछी-बीछी

“जों भगमान बड़ों लेँ छै तेँ के गरीब रों होतै  
 के पहाड़ रँ जिनगी केँ ढोबै मेँ साथ निभैतै’  
 “कोय पूछै तेँ कना सुनैबै—मन रों विथा अपार  
 जिनगी एक गरीबोँ लेली साहू केरोँ उधार”  
 चिंता मेँ बरफों रँ गेना केँ मन गल्लोँ जाय छै  
 हुन्ने मेघों के झुमार सरँगों सेँ टल्लोँ जाय छै  
 सूरज सेँ निकली-निकली केँ बिखरै आबेँ धूप  
 या सोना केँ परसी रहलोँ छै कोय लैकेँ सूप  
 चमकी उठलै एक्के बारगी जे-जे जहाँ-जहाँ पर  
 आँख बेचारी देखै लेँ रुकती तेँ कहाँ-कहाँ पर  
 पानी पर धूपों के पतला-पतला किरिन छै पड़लोँ  
 की साड़ी पर सोना रों ही तार सुनहरोँ जड़लोँ  
 पानी मेँ टुकलोँ बगुला दूरोँ सेँ बहुत सुहाबै  
 उपलैलोँ छै शंख नीचु सेँ सबकेँ हेने बुझावै  
 रेशमी साड़ी रँ चिकनोँ, देहोँ सेँ हवा लगै छै  
 कोय पनिहारिन होले सेँ टकराबेँ, होने ठगै छै  
 गुदगुदाय देँ सौंसे देह केँ देह सेँ लगी लगी केँ  
 लजवन्ती कनियैनी पहिलेँ-पहिलेँ जेना छुवी केँ  
 उवड़ोँ-खाबड़ोँ बांधी सेँ पानी आबै छै चल्लोँ  
 जों बनिहारिन रों बच्चा खेतोँ के बीच उछल्लोँ  
 गूँजै छै पानी के सर-सर दूर-दूर ताँय हेनोँ  
 दूर गाँव मेँ गीतारिन रों गीत, बीहा मेँ जेहनों  
 ढीबा, सुगिया, मंटू रों बुतरू पानी मेँ उछलै  
 मैदानोँ रों पानी मेँ जानी-जानी केँ फिसलै  
 गुदगुदाय वाला पुरबा रों लगथैँ कोमल हाथ  
 निकली ऐलै बूढ़ो सब बाहर बुतरू के साथ  
 हिन्ने गेना ऐंगना-पानी केँ हाथों सेँ उपछै  
 भीत भसकला के कारण नाली के माटी खपछै  
 तरबर होय रैल्होँ छै गेना रों सौंसे देह-हाथ  
 उपछै मेँ भीजलोँ छै या घामोँ मेँ? अनबुझ बात

झुकलौँ धौँनौँ, कमर ऐँठतैँ, सब देहौँ रौँ जोड़  
कत्तैँ देतियैँ साथ ? गेना रौँ दुक्खैँ लागलैँ गोड़  
थकथकाय कौँ बैठी रहलैँ होय कौँ वैठौँ चूर  
'बालम बिन बरखा नै भावै' कोय गाबै छै दूर ।

## शरत-खण्ड

आसिन के माह बीती गेलै ऐलै आबेँ कातिक  
कैतकारोँ हवा सौसेँ देह गुदगुदाबै छै  
जेना छुवी देल रहेँ मोरोँ केरोँ पखना सेँ  
छिनमान होने हवा देहोँ केँ बुझाबै छै  
रूई नाँखी उड़ै लेँ चाहै छै मोँन रहि-रहि  
देहो केँ बँधी केँ रहबोँ आय नै सुहाबै छै  
फूल हेनोँ दिनोँ मेँ पराग नाँखी सौसे रात  
मनोँ के बौराबेँ लागेँ—कातिक कहाबै छै ।

धोलोँ-धोलोँ रात लागै, दिन भी नहैलोँ हेनोँ  
साफ-साफ सरँगो भी कांचे रँ सुहाबै छै  
गरदा के नाम नै कहीं पे जरियो टा भी छै  
चुनी-चुनी बीछी लेलेँ रेँहेँ हेने लागै छै  
रेशमी पटोरी रँ माँटी, मोँन होने मोहै  
मनोँ सेँ विराग-जप-जोग केँ भगावै छै  
धोबी सेँ धुलैलोँ दगदग धोती हेनोँ दिन  
जोगियो रोँ निरमल मनोँ केँ लजाबै छै ।

डाँड़े-डाँड़ गेना आबी रहलोँ उदास खिन्न  
टगधै-झुककै, रुककै फेरु खुद केँ सम्हारै लेँ

साँझोँ के संझबाती जरी चुकलोँ छै घरेँ-घरेँ  
पंडौ भी जुगाड़ोँ मेँ छै आरती उतारै लेँ  
मनबिच्छा पाबै लेँ मसूदन के द्वारी पर  
ठाढ़ी छै जनानी-छौड़ी अँचरा पसारै लेँ  
झटकलोँ-झटकलोँ गेनौ आबी रहलोँ छै  
बाबा केँ कहै लेँ कुछ, बाबा केँ पुकारै लेँ ।

जोरोँ सेँ, होले सेँ बाजै-टुनटुनी मन्दरोँ मेँ छै  
घंटा नाद सेँ मनार घन-घन करै छै  
बाबा रोँ पुजारी आरो भक्त रोँ झुमै छै मोँन  
नाद सुनी पापी रोँ करेजोँ केन्होँ डरै छै  
बंशी जेना कृष्ण रोँ गोपी रोँ मोँन हरै छेलै  
भागवत-भजन होन्है केँ मोँन हरै छै  
ठूठ भीड़ लागलोँ छै देवोँ रोँ दुआरी पर  
जहाँ सुख बरसै छै, जहाँ पुन्य फरै छै ।

पूर्णिमा रोँ रात छै, आकासोँ मेँ दूधिया चान्द  
चाँदी रोँ जलैलोँ दीया-हेने ही दिखाबै छै  
जेना बोहोँ मेँ भाँसै छै कागज रोँ नाव आरो  
बच्चा सीनी देखी-देखी हाँसै, नाचै, गाबै छै  
ओन्हे बोहोँ चाँदनी रोँ बहै छै धरती पर  
भाँसै छै मंदार देखी चाँद मुस्काबै छै  
ठहाका इन्जोरिया के डरोँ सेँ अन्हार आय  
आपना केँ धोँर, लत्ती तोँर मेँ नुकाबै छै ।

धानोँ सेँ जरी टा उच्चोँ गेना, धानोँ केँ हटैनेँ  
आबी गेलै मन्दरोँ के एकदम सामना  
झपटी-झपटी चलै मेँ ऊ हाँफी रहलोँ छै  
रुकै छै केन्हौँ केँ नै शरीरोँ केरोँ घामना

पोछी केँ हाथों सेँ घाम, साँसों केँ जोरों सेँ खींची  
छोड़ी देलकै गेना नेँ बहुत आबी सामना  
मतुर दुआरी पर गोड़ धरतेँ ही हाय  
रही गेलै मने मेँ मनोँ रोँ मनोकामना ।

“केना जाँव भीतर मेँ बाबा रोँ सूरत देखीं  
लोगों लेँ हम्मेँ तेँ होने, जेनाकि बच्चा लेँ भूत  
हम्मेँ नै बड़ो बड़ोक्का, बड़ोँ कुलोँ रोँ चिराग  
आकि धरमों केँ मालिक, टाका वाला केरोँ पूत  
हम्मेँ ऊ जाति रोँ छेकीं जेकरा कि काम एक  
सब्भे रोँ गू साफ करौँ आरो साफ करौँ मूत  
जेना आँख ऐला पर रोशनी आँखी केँ गड़ै  
सब्भे लोगों केँ बीचों मेँ होनै केँ हम्मेँ अछूत ।

“ऊ दिनाँ पुरोहितो तेँ बोलै छेलै यही नी कि  
‘भगवान घट-घट मेँ निवास करै छै  
एक्के ब्रह्म धरलेँ छै यहाँ मेँ अनेक रूप  
सब्भे मेँ बराबरे वही विलास करै छै  
जबकि एक्के ही देव जीव दै छै, पालै-पोसै  
आरो एक्के देव सब केँ विनाश करै छै’  
तबेँ केना भेद भेलै आदमी-आदमी मेँ ही  
एक-दूसरा केँ कहिनै उपहास करै छै ।

“कभी-कभी तेँ लागै छै हमरा यही कि प्रभु  
ठिक्के कैहलोँ छौ तोहें गीता मेँ हँकारी केँ  
तारा मेँ चन्द्रमा छेकौ, देवता मेँ इन्द्रदेव  
पर्वतोँ मेँ मेरू रूप आबौ तोहें धारी केँ  
सागरे जलाशय मेँ छौ, हाथी मेँ एरावत ही  
कामधेनु गाय मेँ छौ—लघुता केँ बारी केँ

पशु में होनै के सिंह, ऋतु में वसन्त छेका  
तबे छोटे रो के होतै ? सोचलौ विचारी के ।

“यहे ते सुनै छियै कि पापी से पापी के तोहें  
तारी देलौ ! तरलै जरा-सा नाम लेथें नी  
बालमीकि तरलै ते तरलै अजामिल भी  
तरी गेलै गोड़ो से अहिल्या भी छुवैथें नी  
पातकी-पतित कत्ते पापो से विमुक्त भेलै  
याद तोरो एक बार हिरदै में ऐथें नी  
यही सब सुनी आबी गेलो छियों द्वारी पर  
कहै छौं—हाथी के सुनलौ सूँढ़ के उठैथें नी ।

“हम्मं नै चाहै छी प्रभु उच्चो घोर, उच्चो जात  
मोक्ष भी हम्मं नै चाहौं, हम्मं यही चाहै छी  
काटी लियौं जाड़ा केन्हौं ऐतनै करी दे तोहें  
आरो ते केन्हौं के सब्भे जेना होय छै साहै छी  
लागै छै यही कि प्रभु काटे पारबो नै जाड़ा  
जबे-जबे आपनो ही सामरथ थाहै छी  
आरो की कहौं तोरा से, सब्भे बात जानथें छौं  
होनै निभी जाय आबे जेनाकि निबाहै छी ।”

एतना कही के गेना मने-मन लौटी ऐलै  
आरो चढ़ी गेलै फेरु खेतो करो आरी पर  
गाड़ो दूध नाँखी वहे चाँदनी, उफनैलो रँ  
बहै छै छप्पर पर, छोट आरी-बारी पर  
मेटकी चानो रो जेना फटी गेलो रहे आरो  
दूध बही गेलो रहे सुखदा-कछारी पर  
लूटै छै चाँदनी परी छत्तो पर चढ़ी-चढ़ी  
रधवा रो रधियो भी आपनो खमारी पर ।



टकटकी लगाय केँ गेना चाँद केँ निरासेँ लागलै  
 माथा पेँ पिठाली सेँ ही टिकुली बनैलोँ चाँद  
 सरंगोँ रोँ कल्पद्रुम आँखी रोँ आगू मेँ रहेँ  
 आरो जेकरा मेँ लागै फूले रँ फुलैलोँ चाँद  
 नीला-नीला सरंगोँ के सागर मथैला सेँ ही  
 भीतर सेँ अनचोकै बाहर ज्यों ऐलोँ चाँद  
 नीचे छुपी गेलोँ छै की बाँही सेँ छुटी केँ प्रिया  
 ऊपर सेँ झाँकी-झाँकी देखै छै बिहैलोँ चाँद

कत्तेँ गोरोँ-गोरोँ बनी रहलोँ छै बौंसी-देह  
 लागै छै कि मली-मली दूधोँ सेँ नहैलेँ रहेँ  
 झुक्कोँ-झुक्कोँ फूल नै ई खिललोँ छै; हेने लागै  
 आपने सेँ गूँथी-गूँथी खोपा मेँ सजैलेँ रहेँ  
 चललोँ छै पूजै लेँ ही मनकामना मन्दिर  
 मनोँ मेँ पुरै के कोय कामना मनैलेँ रहेँ  
 मंदारोँ के ऊपर मेँ चमकै छै चाँद हेने  
 हाथोँ मेँ पूजा के थाली जेना कि उठैलेँ रहेँ ।

देखी-देखी आचरज गेना केँ हुऐ छै घोर  
 चाँद छेकै या कंतरी दही रोँ जमैलोँ छै  
 आकि उत्तपाती कोनो बच्चा नें गुलैलोँ सेँ ही  
 आकासोँ मेँ बड़ोँ-बड़ोँ छेद करी देलोँ छै  
 नै-नै ई शकुन्तला रोँ वने केरोँ खरगोश  
 भूलोँ सेँ मैदानोँ मेँ जे हिन्नेँ चली ऐलोँ छै  
 रही-रही गेना-हाथ पकड़ै लेँ उठी जाय  
 चिन्तै की जे लोगें कहै—गेना उमतैलोँ छै ।

जेनाकि करै छै कोय देखी केँ अजूबा चीज  
 होन्है ही कराय आय चान छै बेचारा केँ

चान की ? लागै छै जेना नीलम-परातोँ में ही  
कल्लेँ-कल्लेँ घुड़कैतेँ रहेँ कोय पारा केँ  
आकि खाली मूड़ी देवदूत रोँ दिखाय पड़े  
तैरेँ मेँ पानी रोँ बीच-पाबै लेँ किनारा केँ  
देखी-देखी जेना छै बौरैलोँ जेना ओकरा केँ  
घोरी केँ पिलैलेँ रहेँ भाँग मेँ धतूरा केँ ।

## शिशिर खण्ड

पूस करी केँ पार निगोड़ा आबी गेलै माघ  
सब ढुकलौं छै घर में; जेना, ओसरै रहेँ बाघ  
हूकै छै की रँ नी हों-हों ठंडा बहै बयार  
दलकै छै बोरसो के आगिन आरो खड़ा मनार  
केन्होँ कुहासोँ बिछलोँ छै—पर्वत सेँ लै केँ खेत  
की कम्बल ओढ़ी सुतलोँ छै पर्वत-भूमि अचेत  
उजरोँ-उजरोँ छिकै कुहासोँ खाली हेन्हें कहाय लें  
आग लगैनेँ छै देहोँ सेँ धरतीं जान बचाय ल  
हेनोँ हानी केँ मारलेँ छै नी पछुवा नेँ लात  
ठिटुरी केँ अकड़ी गेलोँ छै गाछ, गाछ रोँ पात  
सुन्नोँ-सुन्नोँ लागै छै केहनोँ नी खेत-बैहार  
गल्ली-कुच्ची-चौबटिया सब मरघट रोँ संसार  
हेन्हे कन-कन हवा चलै छै, छूवी लै जों देह  
पलक मारथैं टूटी जाय धरती सेँ ओकरोँ नेह  
लोग कहै छै, ई जन्मोँ मेँ नै देखलौं है जाड़  
दलकी केँ देहोँ सेँ बाहर निकली जाय छै हाड़  
एक अकेलोँ हवा चलै छै—उमतैलोँ साँढोँ रँ  
लागै छै बौंसी, रांढोँ के हाथ रहेँ नाँढोँ रँ  
जाड़ोँ के भय सेँ रौदा भी होलै अन्तरध्यान  
हुलकै छै सरंगोँ रोँ पीछू सेँ डरलोँ दिनमान  
सोचै छै सूरज—निकली केँ कौनेँ गँमाबेँ जान

मेघों रों बिल में मूसों रँ दुकलों छै भगवान  
 बर्फों से जादा कनकन्नों पछुवा बहै छै राड़  
 जमलों जाय छै लहु देह रों, गल्लों जाय छै हाड़  
 गेना नेँ बोरसी के आगिन खोरनी सेँ उसकैलकै  
 पझलो-पझलो तावों में थोड़ो-टा जान फुँकलकै  
 सर्दी के मारे तेँ ओकरोँ जान निकललोँ जाय छै  
 लौटी आबै प्राण देह में फेरू चललोँ जाय छै  
 बोरसी केँ गोदी में लै केँ गेना कस्सी लेलकै  
 माय रों सुख जों सीना में बेटा केँ कस्सी पैलकै  
 ज्यों लोगोँ रों नजरीं सेँ बेटा केँ माय छिपाबै  
 गेना बोरसी केँ पछुवा रों डर सेँ होन्हें नुकाबै  
 लेकिन हेनोँ लहर हवा रों उठलै; ताव पझैलै  
 गेना केँ लगलै, गोदी रों बच्चा जेना नसैलै  
 देखी केँ पझलोँ तावों केँ ठण्डों करै छै जोर  
 किटकिट दाँतोँ के साथे में पटपट करै छै ठोर  
 रक्खी केँ बोरसी एक दिश में थरथर करतेँ गेना  
 लेलकै आपनोँ गेनरा, छिनमान ओकरे जिनगी जेना  
 ओढ़ी लेलकै ओकरा, सौंसे देह समेटी लेलकै  
 आरो ठेना के भीतरी में मूड़ी गोती लेलकै  
 तैय्यो दलकै छै गेना, की गेनरा ही दलकै छै  
 लागै छै ओढ़ना के भीतरी बच्चा ही चमकै छै  
 बहुत देर नै रँहेँ पारलै गेनरा देलकै फेकी  
 गेना केँ मुश्किल लागै छै जान बचाना अबकी  
 हिन्ने-हुन्ने देखी केँ कानों पर बीड़ी रखलोँ  
 सुलगैलकै ढिबरी में, पैहलें सेँ ही आधों जरलोँ  
 पीयै छै, पीवी केँ हाथों केँ ठनकाबै लेली  
 मुट्ठी में मूनी केँ रक्खै छै गरमाबै लेली  
 लेकिन तीन फूँक रों बादे बीड़ियो गेलै ओराय  
 सोचै गेना, 'देह गरमाबै केरोँ कोँन उपाय'

रगड़ै छै गोड़ो रों तलवा, कभी हाथ रगड़ै छै  
 जान लेबय्या जाड़ा सेँ जानो लेँ ऊ झगड़ै छै  
 साहस बान्ही घर सेँ भेलै बाहर केन्हौं गेना  
 डरलो-डरलो दोषी बुतरू मास्टर लुग जाय जेना  
 औसरा सेँ निकली केँ बाहर पिछुवाड़ी तक गेलै  
 ई बीचो मेँ कलेँ दाफी बरफ-हिमालय भेलै  
 तोड़ी लेलकै गाछ-बिरिछ रों ठनको-टनको ठार  
 रखलेँ छै झुकलो कान्हा पर निसुवाड़ी रों भार  
 झब-झब आबी बाहर रों बोरसी मेँ बोझी देलकै  
 फेरू ताखा रों ढिबरी लानी केँ आग नेसलकै  
 सुलगी उठलै देखथै-देखथै लहकी उठलै ठार  
 खन-खन पत्ता निसुवाड़ी रों आग करै अम्बार  
 लपट उठै छै आगिन रों, पछुवा सेँ हिलै-डुलै छै  
 जन्नेँ जाय छै आग, गेना रों हुन्नै गला चलै छै  
 लागै छै झूमी-झूमी केँ बीन बजैतेँ रेंहेँ  
 लपटो रों नागिन केँ गेना जिना नचैतेँ रेंहेँ  
 धाव लगै छै देहो सेँ तेँ हटकी-हटकी जाय छै  
 'सोझे लपट उठी केँ नै तेँ भटकी-भटकी जाय छै'  
 बैठलो, उठलै; धोती रों फेंटा केँ कस्सी लेलकै  
 आरो लपटो रों ऊपर सेँ दू-तीन कूद लगैलकै  
 चलतेँ रहलै खेल हेन्हैँ केँ ताव पझैलै जेहनै  
 बोरसी लुग मेँ कुकुड़याय केँ बैठी रहलै तेहनै  
 रात खसी रहलो छै आबेँ, चिकरै गीदड़-सियार  
 गूँजे छै ओकरो कानै सेँ नद्दी, खेत, बैहार  
 सौनों के बोहो रँ हों-हों कनकन बहै बयार  
 घर मेँ दलकै छै गेना; माँदी मेँ गीदड़-सियार  
 जागी रहलो छै दोनों इक चिकरी केँ इक चुप छै  
 दोनों रों बीचो मेँ खाली रात अन्हरिया घुप छै  
 कानै छै कुत्ता कोन्टा मेँ—विष-विष हवा ठहार  
 मोँन बटारै लेँ गेना देवो केँ करै पुकार

दू दिन के बाद कहीं उगलै जाय धूप;

सरँगो रों कोठी में मुन्हन सुरूजों रों  
खोली के किरनों रों धान के ओसाबै छै  
आँगन-दुआरी पर भरी-भरी सूप

दू दिन के बाद कहीं उगलै जाय धूप ।

किलकै छै दुनियाँ ही जेना कि  
चिलका कोय किलकै छै अनचोके सोरी घोर  
साठी रों चटकन सेँ, खलखल रँ रूप

दू दिन के बाद कहीं उगलै जाय धूप ।

हाँसै छै खलखल की गेंदा रों फूल !

जेना कि डेढ़िया रों नीचे में गुलदाउदी  
धारी में सजलों ठठाबै छै अनपट्टों  
मोहै छै; जेना, कोय बचपन रों भूल

हाँसै छै खलखल की गेंदा रों फूल !

रौदें जे छुलकै तें की सुरुजमुखी भी  
लाज-बीज छोड़ी के देह देलकै खोली के  
फुटलों जुआनी छै छोड़ी के कूल

हाँसै छै खलखल की गेंदा रों फूल !

भोरे-भोर ओसो सेँ लोत-पात झपलैलो !

ओझरैलोँ, शरमैलोँ, भारी देह, अलसैलोँ  
कद्दू के लोँत छै पसरलोँ दीवारी पर  
खोपा मेँ रातके लगैलोँ फूल-कुम्हलैलोँ

भोरे-भोर ओसोँ सेँ लोँत-पात झपलैलोँ !

ढकमोरलोँ ठारी रोँ बीचोँ मेँ कत्तेँ नी  
रौदी दिश चोंच करी कचबचिया चहकै छै  
माथा पर मोती लै दुबड़ी छै भरमैलोँ

भोरे-भोर ओसोँ सेँ लोँत-पात झपलैलोँ !

भुटकुरलोँ बुतरू सब देहरी पर बैठलोँ छै;

बान्ही केँ गाँती कोय उछलै छै ऐंगना मेँ  
आरो कोय सटलोँ दीवारी सेँ खाड़ोँ छै  
तापै लेँ रौद जोरें बिरनी रँ टुटलोँ छै

भुटकुरलोँ बुतरू सब देहरी पर बैठलोँ छै ।

रौदी सेँ बुतरू-मूँ सोना रँ चमकै छै  
की बुतरू-मूँ छूवी केँ चमकै छै सोने ठो  
ऐंगना मेँ बैठै लेँ टुनटुनमौ रुसलोँ छै

भुटकुरलोँ बुतरू सब देहरी पर बैठलोँ छै ।

गेना भी बैठलोँ छै ठेहुना मेँ मूँ गोती ।

उसुम-उसुम रौद गिरी रहलौं छै धौना पर  
फेरू ऊ धौनो से पीठी तांय टघरै छै  
नढ़िया देह, कमरो से सटलो छै बस धोती

गेना भी बैठलो छै ठेहुना मेँ मूँ गोती ।

सोचै छै मने-मन, 'बल्हौं छी बौंसी मेँ  
मरला पर फाँक भरी कपड़ौ तेँ नै मिलतो  
कानवो नै करतै कोय एक झुनिया माय रोती,

गेना भी बैठलो छै ठेहुना मेँ मूँ गोती ।

सोचै छै मने-मन, "की होतै झुनियाँ के ?

चूल केन्होँ लागै छै बगरो रोँ खोता रँ  
इक ठोप्पोँ तेलोँ केँ जानबो करै छै की  
मूँ केन्होँ लागै छै कुम्हलैलोँ नुनियाँ के'

सोचै छै मने-मन की होतै झुनियाँ के ?

"दू दिन तेँ होले छै' बाप मरी गेलोँ छै  
रस्ता कोय देखी नै शरणोँ मेँ ऐलोँ छै  
दुखियैँ दुख जानै, भरोसोँ की दुनियाँ के"

सोचै छै मने-मन की होतै झुनियाँ के ?

"दुख आवै, गुन मारै, बड़ोँ-बड़ोँ गुनियाँ के ।

की करै पारै छी दूनू लेँ सोचै छी  
चिन्ता मेँ देह कभी, चूल कभी नोचै छी



दुख तें लहरनी ही लागै छै लौनियाँ के

दुख आबै, गुन मारै बड़ो-बड़ो गुनियाँ के ।

दैवो के चक्र केन्हो घूमै छै हन-हन-हन  
रुख्ये रँ धूनै छै सब्भे के धुनकी सें  
के जाने रीत बड़ी अजगुत छै धुनियाँ के

दुख आबै, गुन मारै बड़ो-बड़ो गुनियाँ के ।

“तहियो की लोग थकी-हारी के बैठलो छै;

जेठो में रौद सहै, पूसो रो पल्लौ तक  
अन्धड़, बतासो, बिन्डोबो से झगड़ै में  
सुखलो आमो के ही तखै रँ ऐंठलो छै

तहियो की लोग थकी-हारी के बैठलो छै ।

लोगें जों चाहे ते धरती के सरंगो पर  
सरंगो के धरती पर लानी के रक्खी दे  
लोगे नी दुनियाँ के बदलै में जुटलो छै

तहियो की लोग थकी-हारी के बैठलो छै ।

“हमरो ई किस्मत बदलतै नै केना के;

लौटतै भाग । मनो से एड़िया रगड़ला पर  
पानियो भी लोटै छै भुय्याँ पर मछली रँ  
उल्टै छै, पल्टै छै—छलमल छल जेना के

हमरो ई किस्मत बदलतै नै केना केँ ।

असकल्ले रैथियै तेँ बात छेलै आरो कुछ  
आबेँ तेँ दू-दू परानी छै हमरोँ साथ  
लान्हे लेँ लागतै सुख पकड़ी केँ गेना केँ

हमरो ई किस्मत बदलतै नै केना केँ ।”

आँखी मेँ शहरोँ के शान-शौक नाँचै छै ।

देखै छै—सड़कोँ पर ठेला चलाबै छी  
दू मोटिया ढोला पर दू टाका पाबै छी  
सोची केँ हिरदय रोँ हिरना कुलाँचै छै

आँखी मेँ शहरोँ के शान-शौक नाँचै छै ।

मोटिया उठैतै जे, ठेला चलैतै जे  
देखै छै धौनोँ कि बोझोँ लायक छै की नै  
कुल्होँ-कलैयो भी झोली केँ जाँचै छै

आँखी मेँ शहरोँ के शान-शौक नाँचै छै ।  
सपन्है मेँ गेना नी एत्तेँ अघैलोँ छै  
भुल्लै—गरीबी मेँ कत्तेँ टौव्वैलोँ छै  
धौना पर दूधोँ मेँ बरकैलोँ रौद गिरे  
जेना मधुमक्खी रोँ छत्ता सेँ मोँद गिरे  
झर-झर-झर, उसुम-उसुम रौद अभी बरसै छै  
गदगद मोँन गेना रोँ; गेदै रँ हरसै छै ।

## नगर खण्ड

‘रेशम रँ चिकनोँ छै की सड़के, गलियो भी  
बोलै छै बड़के नै, टाँय-टाँय निबोलियो भी  
सजलोँ चौबटिया छै —मीना बाजारे रँ  
चमकै छै सौसेँ ठो शहर केन्होँ पारे रँ  
छूतेँ आकासोँ केँ उच्चोँ हवेली छै  
साजोँ मेँ हेने; कोय दुल्हन नवेली छै  
लोटकी की रोशनी रोँ लटकै छै ठामे-ठाम  
के छै ? लगाबेँ जे—की छै ई सबके दाम  
लागै छै टूटी आकासे ही गिरलोँ छै  
धरती पर जेकरा सेँ तारा बिखरलोँ छै  
की जरै ! की बूतै ! छोटका सब झकझक रँ  
गुजगुज अन्हरिया मेँ भगजोगनी भकभक रँ ।

“टमटम छै, रिक्सा छै आरो छै रेलो भी  
सिनमा भी, थैटर भी, जादू के खेलो भी  
सरंगोँ के परियो सेँ सुन्नर सब मौगी छै  
पीछू सेँ लागलोँ कुछ जट्टा बिन जोगी छै ।

“की रँ लहरैलोँ सब चूलोँ केँ चल्लोँ छै  
गठले नै; जेकरोँ जुआनी भी ढल्लोँ छै

देखी केँ गेना कुछ ओझरैलै, शरमैलै  
सोचै छै—मौगी की शहरोँ रोँ पगलैलै ।”

धारी मेँ सजलोँ छै सौ-सौ दूकाने नै  
साहू रोँ, सेठोँ रोँ उच्चोँ मकाने नै  
ठामेठाम शीशा रोँ बक्सा मेँ मूरत छै  
सच्चो सेँ सुन्नर, की देखै मेँ सूरत छै !  
एक्के दूकानी मेँ भीड़ केन्होँ मेला रँ  
लागै सँकराती मेँ बीसी रोँ खेला रँ  
हदहद करै छै लोग; आबै छै, जाबै छै,  
अपना केँ गेना अकेलोँ पर पाबै छै ।

दू कोस सेँ झटकी केँ चली केँ ऐलोँ छै  
माथा पर कसकेँलोँ मोटरी उठैलोँ छै  
इक-इक नस देहोँ रोँ बाहर दिखाबै छै  
बोझोँ छै हेनोँ कि गोड़ थरथराबै छै  
घामोँ सेँ लथपथ छै देह, चुवै मेहे रँ  
धुरदा सेँ सनलोँ देह, देह लागै देहे रँ  
धौकनी रँ साँस चलै, मुँह तमतमैलोँ छै  
दू कोस सेँ झटकी केँ चली केँ ऐलोँ छै  
सामन्हें मेँ सेठ विरिजवासी-दुकानोँ मेँ  
रखना छै नीचेँ, कुछ ऊपर दलानोँ मेँ  
रक्खी केँ, टाका लै चललै; मन चूर-चूर  
गोड़ गिरै जै ठां, मन ओकरा सेँ दूर-दूर  
खोली मेँ आबी केँ गिरलै चित्त, बेसुध होय  
गिरै छै गाछी सेँ कटलोँ ठार जेना कोय  
देहो डोलाबै के शक्ति नै बचलोँ छै  
गिरलोँ छै जेना देह, होनै केँ गिरलोँ छै  
खोली मेँ गेना छै आरो अन्हरिया छै  
आँखोँ मेँ रात गड़ै; देहोँ मेँ बोरिया छै ।

चाहै परकाश करौं, घोंड़ मतुर चूर-चूर  
मन चाहै उठै लेँ देहे पर दूर-दूर  
थकलोँ मोँन, चुरलोँ देह, भुखलोँ अटट्ट छै  
गिरलोँ छै गेना चित्त, किंछा सब पट्ट छै ।

हेनै केँ थकलोँ रोज गिरै छै खोली में  
जेनाकि ओकरे रँ ओकरे ही टोली में ।

टोली रोँ लोगोँ केँ देखी केँ हहरै छै  
बेढंग बेवस्था पर मने-मन कुहरै छै  
सोचै छै, समझै छै, बूझै छै, गुनै छै,  
भाँगलोँ नसीबोँ पर माथा केँ धूँनै छै  
'झुट्टे ई नारा-परचार सब्भैं करै छै  
आपने लेँ, आपने रँ लोगोँ लेँ मेरै छै ।

“नारा गरीबोँ रोँ, सौदा अमीरी के  
खुब्बे ई शासन छै बस जी हजूरी के !

“केकरा छै मतलब गरीबोँ रोँ बातोँ सेँ  
पैसा कमाना छै लातोँ सेँ, जातोँ सेँ  
सामरथ केँ पैसा छै, पदवी, मनोरंजन छै  
एक्के गरीबोँ रोँ खाली दुरगंजन छै  
टाका छै जेकरा, लड़ाबै छै लोगोँ केँ  
बूँनै छै मनोँ मेँ की-की नै रोगोँ केँ ।

“भुक्खड़ की करतै; ऊ लालच मेँ बिकथैं छै  
जे-जे सिखाबोँ सब हेना मेँ सिखथैं छै  
नारा दिलबाबोँ, गिरबाबोँ वोट मेँनोँ सेँ  
कीनी ला जे छै गरीबोँ केँ धेँनोँ सेँ !

“कल जों गरीबो भी बड़का रँ होय जैतै  
मनबिच्छा राजा केँ गद्दी की नै देतै ?

“गद्दी बचाबै लेँ राजां ई जानै छै  
टाका, गरीबी अँ जातोँ केँ मानै छै  
जाती मेँ बाँटी केँ सब्भे मनुक्खोँ केँ  
बाँटलेँ छै राजा नेँ अपना मेँ सुक्खोँ केँ ।

“हिन्नेँ सब जातोँ रोँ फेरा मेँ ओझरैलोँ  
मुठ्ठी भर अन्नोँ लेँ केन्होँ छै टौव्वैलोँ  
केकरा समझाबेँ के ? कोय भी समझतै की  
हेनोँ बौरैलोँ छै, कुच्छू कोय बुझतै की  
राजा तेँ ठिक्के सेँ रहतै हीं; रेँहै छै  
परजा केँ सहना छै जे-जे, से सेँहै छै  
सेँहै छै हेनै केँ ? आपनोँ करतूतो सेँ  
है जे टौव्वावै छै—उच्चोँ-अछूतोँ सेँ !

‘खूब्बे परचार करोँ उच्चोँ-अछूतोँ रोँ  
आदमी रोँ बस्ती मेँ आदमी के भूतोँ रोँ  
पत्थर केँ पूजै छै, धिरना मनुक्खोँ सेँ  
फाटतेँ होतै छाती देव्हौ रोँ दुक्खोँ सेँ ।

“पूजा मेँ, प्रेमोँ मेँ, स्नेहोँ मेँ, भक्ति मेँ  
गिरला केँ ऊपर उठावै के शक्ति मेँ  
शांति छै, जीवन छै, पापोँ रोँ मुक्ति छै  
सुक्खोँ सेँ रेँहै रोँ यहें एक युक्ति छै ।

“लोगें नै मानें छै, लड़े छै । की करभौ!  
जरै छै जानी केँ, जेरै लेँ दौ । की पड़भौ !

मनुर ई जानले छै—ई तेँ एक आग छेकै  
चानोँ के मुँहोँ पर करिया रँ दाग छेकै  
मिली केँ रेहेँ देँ येँ नै मनुखोँ केँ  
सुखोँ रोँ लहू पिलाबै येँ दुखोँ केँ  
आरो ई जब तक दुख रहतै, ई मानले छै  
टाका पर बिकथैँ ही रहतै सब, जानले छै ।

“थोड़ोँ टा सुखोँ लेँ जिनगी रोँ दुखोँ केँ  
जोड़ै छै, आरो बोहाबै छै सुखोँ केँ  
केकरा समझाबै केँ; कोय्यो समझतै की  
हेनोँ बौरैलोँ छै, कुछू कोय बुझतै की  
जाति रोँ बल्लोँ पर, धरमोँ के नामोँ पर  
हीरा की मिललोँ छै कौड़ी के दामोँ पर ?

“लेँडै के छेकै गरीबी सेँ; लड़तै नै  
अच्छा जे रस्ता छै, ओकरा पर बढ़तै नै  
लेँडै के छेकै मनुखोँ रोँ दुश्मन सेँ  
लड़ै छै कोयरी सेँ, कैथोँ सेँ, बाभन सेँ ।

“सब्बे जातोँ मेँ कोय पापी तेँ होतै छै  
ओकरोँ संग कैन्हें कोय जाति केँ जोतै छै  
ई तेँ एक चाल छेकै आदम रोँ शतरू के  
भूलो सेँ समझोँ नै भूल कभी बुतरू के  
जौनेँ नै चाहै छै आदमी रोँ सुखोँ केँ  
जाति रोँ नामें लड़ाबै मनुखोँ केँ ।

“हमरा नै समझै मेँ कटियो टा आबै छै  
जाति मेँ आखिर की केकरा बुझाबै छै  
आपना कन राम छेलै, कृष्ण छेलै, व्यास भी  
गौतम भी, बाल्मीकि, संत रैदास भी

जातिये के कारण की हिनी महान छेलै'  
आरो की ये वास्तें—हिनका मेँ ज्ञान छेलै ।

“जाति रोँ बल्लोँ पर खाड़ोँ के रहलोँ छै  
व्यासें नेँ ‘भारत’ मेँ आखिर की कहलोँ छै—  
कर्में बनाबै छै जाति मनुक्खोँ रोँ  
भुलबे ई बातोँ केँ जोँडु छेकेँ दुक्खोँ रोँ  
अच्छा मनुक्खोँ केँ दुनियाँ ही खोजै छै  
कौने नै विष्णु केँ, शंभू केँ पूजै छै !

“शुंभो भी केँहें नी घर-घर पुजाबै छै ?  
लोगोँ केँ समझै मेँ केँहें नी आबै छै ?  
“आपने नै चेततै, तेँ लोगें लड़ैतै नै  
उच्चोँ-अछूतोँ केँ खोड़ा पढ़ैतै नै  
लड़ै, तेँ हमरा की ! लेकिन ई लड़ला सेँ  
राकस रोँ रस्ता पर जानी केँ बढ़ला सेँ  
होतै की ? लड़ैतै सब, लोगोँ रोँ नाश होतै  
धरती पर भूतोँ-पिचासोँ रोँ बास होतै  
लोगोँ रोँ रहतै बस एक्के कहानी ही  
लागतै बुझव्वल रँ, एकदम पिहानी ही ।

“घेँरोँ मेँ बाघोँ रोँ, बानर रोँ बास होतै  
मन्निर मेँ देवोँ ठाँ राकस रोँ रास होतै  
होतै तेँ हमरा की ! हमरोँ केँ मानै छै  
केँथी लेँ उच्चोँ-अछूतोँ केँ ध्यानै छै  
ध्यानौ, तेँ हमरा की ! लेकिन है ध्यानला सेँ  
लोगोँ केँ लोगोँ मेँ भेदभाव मानला सेँ  
लड़थैं ही रहतै सब आरो गरीबी ई  
जाबेँ नै पारेँ छै केँहैं केँ अभी ई ।



“राजा तेँ चाहतै छै, लेँड़ौ कोय बात लै  
‘मुँहोँ मेँ धरमों केँ, माथा मेँ जात लै’

“हुन्नेँ तेँ राजा रोँ छक्का छै छक्का पर  
टाका हँसौतै छै थक्का रोँ थक्का पर  
घूमै छै सरंगोँ मेँ, वायु सेँ बात करै  
टाका रोँ बल्लोँ पर दिनोँ केँ रात करै  
छन्है मेँ सागर के पार, छन्है दिल्ली मेँ  
हमरे रँ ठोकलोँ छै बाँसोँ रोँ किल्ली मेँ !  
बगुला रँ कपड़ा मेँ टोपी की धारै छै  
महकै छै चन्दन—पसीना जों गारै छै  
आबै तेँ की रँ के हद-हद-हद भीड़ जुटे  
देखे मेँ, केकरो मुँ-हाथ, कहीं गोड़ टुटे ।

‘देवथौ केँ देखै लेँ एत्तेँ नै लोग जुटे  
बाबू हो, सरंगों मेँ बिगिधन रँ लोग टुटे !

“राजा केँ है सबसेँ मतलब की ? भाखै छै  
धरती सेँ ऊपर ही टाँग-हाथ राखै छै  
के नै ई जानै छै—एत्तेँ कुछ, टाका लेँ  
हाय-हाय केँरे की देशोँ लेँ ? टाका लेँ  
चाहै छै, भरौँ तिजोरी मेँ, घेँरोँ मेँ  
छपरी मेँ, ठारी मेँ, मिट्टी के तेँरोँ मेँ  
सोचौ तेँ, यै मेँ छै परजा रोँ भाव कहाँ  
केकरो लेँ छोड़ै छै तनियो टा दाव कहाँ  
केन्हीं केँ सबटा हसौतै मेँ लागलोँ छै  
परजा रोँ राजों मेँ राजा-भाग जागलोँ छै ।

“केकरा छै ताकत कि राजा केँ रोकी लौ  
भूलो सेँ अनचोके कथू लेँ टोकी लौ

लड़तै सब आपसे मेँ, राजा केँ रोकतै की  
आपने झोकैलोँ छै, दुश्मन केँ झोकतै की !

“कोय की सराहै लायक ! केकरा तों कहबौ की  
आपने मूँ जरलौं छौं; दूसरा केँ दूसबौ की  
जब ताँय दिल साफ नै लोगोँ रोँ हुऐ छै  
मेंनें नै मनोँ केँ नजदीक सेँ छुऐ छै  
तब ताँय गरीबी मिटाबौं; विचारे की ?  
पहुनोँ दलिद्दर सेँ छूटै के चारे की ?  
शोषण-व्यवस्था, गरीबी मिटाबै लेँ  
लोगोँ सेँ लोगोँ केँ लागेँ जुड़ाबै लेँ  
तभिये कोय काम हुएँ पारै छै सुक्खोँ रोँ  
नै तेँ बिण्डोबोँ ई देखथें छोँ दुक्खोँ रोँ ।

‘नै करै राजा पर चाहियोँ की ? क्षेम करेँ  
सौंसे समाजोँ रोँ परजौ सेँ प्रेम करेँ  
राजा तेँ राजै छै ! परजो मेँ भेद की  
चलनी मेँ छेद हुएँ, धैलोँ मेँ छेद की ?

“ज्ञानी जे राजा छै—वै ई सब समझै छै  
परजा रोँ रूपोँ मेँ ईश्वर केँ बूझै छै  
आबेँ पर है रँ के राजा रोँ लोप भेलै  
यै लेँ कि पंडित सब, काजी सब, पोप भेलै  
देखै छी सब्भे अधर्मे मेँ हेलै छै  
मट्टी केँ हपकै छै, पापोँ सेँ खेलै छै ।

“पापे नी छेकै कि धरमोँ के नामोँ पर  
लड़ै, लड़ाबै छै, काटै छै दुनियाँ भर  
माँटी मेँ देश मिलेँ, गाँव मिलेँ, लोग मिलेँ  
लोगोँ रोँ लोगोँ सेँ पुस्तैनी प्रेम हिलेँ

है रँ के धरमोँ सेँ अच्छा अधरमेँ नी !  
रहबोँ विधरमी; कोय कहतै बेशरमेँ नी !  
धरमोँ रोँ झंडा जे देश-दोस्त बाँटे छै  
खूनोँ रोँ रिश्ता केँ झाड़ू सेँ झाँटे छै  
एकरा सेँ बेँड़ी केँ पाप आरो की होतै  
धरमेँ नी शाप तबेँ ? शाप आरो की होतै ?

“अलबत ई लोगो छै, समझै नै, बूझै छै  
धरमोँ के नामेँ अधरमेँ बस सूझै छै  
केँथी लेँ ? की मिलतै—टके-सिंहासन नी !  
ज्यादा सेँ ज्यादा इनरासन रोँ शासन नी ?

“कौनेँ अमरितोँ रोँ धार पीबी ऐलोँ छै  
ब्रह्मा रोँ किस्मत केँ बान्ही केँ लानलोँ छै  
दू दिन रोँ ताम-झाम फेरू फगदोले नी  
हंसा बिन जलतै शरीरोँ केँ खोले नी  
केँ फेरू हमरा लेँ ? हमरोँ लेँ की रहतै  
सम्पत ? सिंहासन ? की इनरासन साथ जैतै  
पदवी ? प्रतिष्ठा ? की कंचन रे काया ई ?  
जात-पात, धरम-वरन, धरती रोँ माया ई !

“मट्टी, आकासोँ, बतासोँ रोँ, आगिन रोँ  
देहोँ रोँ भागे की निट्ठा अभागिन रोँ !

“तहियो है देहोँ रोँ मानलोँ छै, मोल छै  
कत्तो ई आगिन रोँ, पानी रोँ खोल छै  
मिट्टी रोँ देहोँ सेँ कटनौ तेँ मुश्किल छै  
हंसा-कुहंसा सब एकरै मेँ शामिल छै  
देहे नै रहतै, तेँ उच्चोँ विचार कहाँ  
देवोँ रोँ, दुखियो रोँ, केकरो उपकार कहाँ

हंसा केँ साथै लेँ येँहो तेँ जोगनै छै  
जे कुछ यैँ भोगै छै, ऊ सब तेँ भोगनै छै

“लेकिन सीमानै मेँ सब्भे कुछ ठीक छै  
गाड़ी केँ हाँकै लेँ बनले तेँ लीक छै  
लेकिन के हाँकै छै ! हाही रोँ मारलोँ सब  
साँसोँ रोँ धौँकनी सेँ हंसा तक जारलोँ सब  
एकरै सेँ दुनियाँ मेँ हेत्तेँ ई हाय-हाय  
पश्चिम सेँ लै केँ पूबारी तक कांय-कांय ।

“हेँ रँ रोँ लछ्छन मेँ दुनियाँ सुधरतै की !  
पेटोँ रोँ रेसोँ मेँ कमजोरेँ करतै की ?

“एकोँ रोँ देह सूखी करची रँ बनलोँ छै  
दुसरा रोँ पेट फूली बेलुन रँ तनलोँ छै  
देवता रोँ रस्ता सुझैतै की, देहे नै ?  
हरियैतै धरती की ? सरंगोँ मेँ मेहे नै !

“भाखन दै राजां विचारोँ सब सुन्नर रोँ  
धरती पर बसवै, समृद्धि सब इन्नर रोँ  
एकदम झूठ; भरलोँ छै पेट तहीं बोलै छै  
आसन पर साँपोँ रँ देह तहीं डोलै छै  
की बसतै, धरती पर स्वर्ग; सभे जानै छी !  
जनमी केँ कानलौं, तखनिये सेँ कानै छी !

“जेकरा जरूरत छै जतना, ऊ मिलेँ तेँ  
कोदिये मेँ कुम्हलैलोँ फूल पहिलेँ खिलेँ तेँ  
धरती पर स्वरगोँ केँ होनै छै, आनै छै,  
कल्पवृक्ष सुक्खोँ रोँ जानी लेँ खिलनै छै !

“एकरा मेँ राजा केँ पहिनेँ सुधरना छै उच्चोँ पेट काटी केँ खलिया केँ भरना छै आरो जरूरी छै लोगो रोँ शिक्षा के परहित रोँ आरो संतोखोँ रोँ दीक्षा के ओकरा बताना छै—एत्तेँ ई जोड़े मेँ स्वर्ग कहीं धरलोँ छै माथा केँ फोड़े मेँ !

“माँटी रोँ देहोँ रोँ एत्तो की ताम-झाम ! एक दिन तेँ होनै छै अर्थी पर राम ! राम ! लहकी केँ सारा पर मिट्टी मेँ मिलनै छै कत्तोँ मजबूत करोँ पाया ई हिलनै छै

“एकरै लेँ एत्तेँ ई सोना जुटावै छै ! एत्तेँ, कड़कड़िया ई रौद मेँ टटावै छै !

‘देहोँ लेँ देहे भर ! हंसा लेँ जोड़ना छै हाही रोँ जब्बड़ दीवारी केँ तोड़ना छै जोड़ना की जाति रोँ नामोँ पर ? धरमोँ पर ? कथी लेँ कूदै छै कुत्ता के करमोँ पर !’

‘जानेँ ऊ दिन कहियो की घुरतै देशोँ मेँ एक्के रँ लागतै सब एक्के रँ भेषोँ मेँ एक्के रँ बोलतै सब मिसरी रँ बोली मेँ मन मोहतै; नैकी बहुरिया जोँ डोली मेँ आरो बस एक्के जात होतै मनुखोँ रोँ घुरतै ई देशोँ मेँ कहिया दिन सुखोँ रोँ कहिया दिन ऐतै, कुधरमोँ केँ छोड़ी केँ जात-पात, ऊँच-नीच-परथा केँ तोड़ी केँ रहतै सब आपने रँ आपनोँ ई देशोँ मेँ एक्के रँ लागतै सब एक्के रँ भेषोँ मेँ

‘रूप-रँग सब्भे रों सब्भे रँ होतै पर  
 मेंनोँ के रूप-रँग एक्के रँ होतै पर  
 कानतै कोय, सब्भे रों आँखी मेँ लोर होतै  
 गुजगुज अन्हरिया मेँ कहिया है भोर होतै ?  
 जमतै चौपाल कबेँ फेरू दुआरी पर ?  
 बिरजू रों ऐंगना मेँ, रमजू खमारी पर ?  
 मिसिर का, मंडल का, दत्ता दा साथ होतै ?  
 दुनियाँ भर लोगोँ रों दुनियाँ भर बात होतै ?  
 सरजू सिंह जादव रों विरहा की ! चैता की !  
 मेंनों सेँ होन्हे चौपालों मेँ गैता की ?  
 रानी सुरँग रों, कमला रों गीत हौ !  
 बिहुला रों वाला सेँ मरल्हौ पर प्रीत हौ !  
 राजा सलेसोँ केँ सपना हौ मैया रों !  
 कसकै करेजोँ जे सुनथैं सुनवैया रों !  
 जानेँ ऊ दिन कहिया की घुरतै देशोँ मेँ ?  
 मंगरू दा मोहतै भर्तृहरि रों भेषों मेँ !

“पूजा मेँ, परबोँ मेँ मिलतै सब होन्है केँ  
 मानतै सब, सब्भे केँ जेना कि पहुन्है केँ ।

“काली-दशहरा मेँ नाटक हौ राणा रों !  
 मंचोँ पर चलती हौ केशरिया बाना रों !  
 बाबू कुँमरजी रों देशोँ लेँ कुरबानी !  
 झन-झन-झन झाँसी रों असकल्ली मर्दानी !  
 आरो कौशल्या रों कानबोँ हौ राजा लेँ !  
 रामोँ रों राजपाट सब्भे टा परजा लेँ !  
 रावन रों राजोँ मेँ सीता रों साहस हौ !  
 लक्ष्मण रों मुखा पर रामोँ रों ढाढ़स हौ !  
 नाटक की नाटक रँ लागै ! बस सच्चे रँ  
 दशरथ रों बच्चो जों कानै तेँ बच्चे रँ !

“आबें हौ बात कहाँ, सब्भे रों साथ कहाँ  
अच्छा सत्कमीँ मेँ दस ठो रोँ हाथ कहाँ  
केँहाँ हौ मस्ती छै ! केँहाँ मेँ धूमधाम !  
केँहाँ रामलीला मेँ भीजै छै सीताराम !

“कहाँ हौ होली के रँगोँ रोँ छर्र-छर्र !  
गिरै पिचकारी सेँ दूधे रँ गर्-गर् !  
बदली जाय देहरी-दुआरी के रँगो-रूप  
गिरै असमानोँ सेँ एकदम गुलाबी धूप  
मिरबा का, मंटू दा, मटरू दा, चौरासी  
लछमनियाँ, लपकी बहुरिया रोँ नन्दोसी  
पचकौड़ी (पोता पुरहैतोँ रोँ) ढोढ़ी दा’  
छोड़ै की केकरौ ? है कहलोँ पर-‘छोड़ी दा !

“हुन्नेँ बुलाकी रोँ सब्बड़ कनियैनो की !  
सामना मेँ ठेँठै मरदाना मेहमानो की ?  
रूपसा, बरमपुर रोँ, डाँढ़े, झपनिया रोँ  
आँखी मेँ नाँचै छै होली दुल्हैनियाँ रोँ !  
उड़ै अबीरोँ रोँ बादल; रँग बरसै की !  
भीजै सब एक्के ठाँ; भीजै लें तरसै की !  
की गोरोँ, की गेहुआँ, रँगोँ-अबीरोँ सेँ  
लागै कन्हैये रँ आपनोँ शरीरोँ सेँ  
होन्है केँ कहिया सब मिलतै ई देशोँ मेँ  
एक्के रँ लागतै सब एक्के रँ भेषोँ मेँ !

“ऐतै तेँ ऐतै ही, बाकी कुछ देर छै  
ऐलोँ नै सुख छै तेँ कर्म रोँ फेर छै  
धरती रोँ बेटा नै आभी ताँय जगलोँ छै  
किस्मत मेँ फेरा शनिच्चर रोँ लागलोँ छै

फेरा ई टुटनै छै, आदमी के जागनै छै  
कल्ले देर ग्रसतै चान ? राहू के भागनै छै  
मिलतै सब भेद-भाव भूली के आदर से  
पूजा रो जोग मानी हमरो रँ कादर से  
सुग्गे रँ मीठो बोल, बोलतै सब आपस में  
अन्तर ते आनै छै लोगो में, राकस में  
एक्के रँ सोचतै सब, एक्के वेवहार-बात  
प्रेमे एक धर्म होतै आरो मनुक्खे-जात  
घुरी के बितलो दिन आन्हें छै देशो में  
एक्के रँ लागतै सब एक्के रँ भेषो में !

“खुब फूले, झूमे, गाबे लोग हमरो गाँव रो !  
देश के सुन्दर बनाबे लोग हमरो गाँव रो !  
होय अचंभित बोलै कोयल भी बनो में आम रो  
बोल कुछ हेनो सुनाबे लोग हमरो गाँव रो !  
रूठी के चल्लो गेलो छै शांति बीजू वन में जे  
दूत लानै ले पठाबे लोग हमरो गाँव रो !  
जे महत्मा, पीर, पंडित ने बतैने छै यहाँ  
बात ऊ भुललो बताबे लोग हमरो गाँव रो !  
दिल में उमड़े प्यार रो गंगा नदी, सिंधु नदी  
राग कुछ हेनो सुनाबे लोग हमरो गाँव रो !

“लीक से बेलीक होय चल्लै बहुत, आबे रुके !  
बुद्ध बनना छै कि अँगुलीमाल भी आगू झुके !  
रास्ता बाकी बहुत छै, वक्त थोड़ो छै मतुर  
राह में है रँ झगड़बो केकरा शोभै छै ! अधुर !  
बात है सब के बताबे लोग हमरो गाँव रो !  
खूब फूले, झूमे, गाबे लोग हमरो गाँव रो !



“लूट, हिंसा, द्वेष, धिरेना पूँजी नै हमरोँ छिकै  
हम्मेँ सब ऊ नै छिकौँ जे पाप रोँ धन पर बिकै  
खून मेँ हमरोँ घुलै छै राम-राणा रोँ लहू  
कष्ट देखी के हहरलै हमरोँ पूर्वज की कहूँ ?  
तेँ केना हम्मेँ हहरबै पाप रोँ अन्याय सेँ ?  
की कहूँ प्रह्लाद जललै होलिका के हाय सेँ ?  
मानलौँ कि देश मेँ फेरू दुशासन-जोर छै  
द्रोपदी रोँ आँख मेँ डबडब-लबालब लोर छै  
दै हँकारोँ कुंभकरणोँ रोँ बलोँ पर दशमुहाँ  
वीर देशोँ रोँ लखन ओँ रामो पर डरलोँ कहाँ ?  
रास्ता हमरा बनाना छै वनोँ रोँ बीच सेँ  
भेंटबे करतै, मतुर डरना की बाघोँ-रीछ सेँ !  
राजां परजा सेबतै फेरू भिखारी भेष मेँ  
रास रचनै छै फिरू सेँ ही समुच्चे देश मेँ  
सीख सन्तोँ रोँ सिखाबेँ लोग हमरोँ गाँव रोँ !  
खूब फूलेँ, झूमेँ, गाबेँ, लोग हमरोँ गाँव रोँ”

देखै छै सपना की सुन्नर—सब हाँसे छै !  
गुजगुज अन्हरिया मेँ गेना निरासे छै ।

## पतझड़-खण्ड

जे तरह सन्यासी तेजै गद्दी या धनधाम  
आरो जोगीं तृष्णा-माया-लोभो-रागो-काम  
जों पति-परदेश पर तिरियां तजै सिंगार  
तेहने तेजै पीरों पत्ता केँ निपत्तोँ डार

नागा हेनों धारा-पाँती मेँ खड़ा छै गाछ  
खोली केँ सौंसे बदन कान्हा सेँ लैकेँ काछ  
रात मेँ ई ठूँठ लागै नँग धडंग रँ भूत  
दिन मेँ लागै खाड़ोँ छै श्मशान मेँ अवधूत

सामना मेँ ठूँठ पीपर रों सहस्त्रो डार  
जों बुझाबै छै सहसबाहु के ही अवतार  
आकि पत्तावाला डाली भेलै धरती तोँर  
आरो जेना भै गेलोँ छै उल्लै ऊपर जोँड़  
बोहोँ पत्ता रों बहै छै; दै हवां छै जोर  
लड़खड़ावै, खड़खड़ावै छै, करै छै शोर  
हरहराय केँ खड़-खाई केँ करै छै सोँर  
जे जहाँ छेलै वहीं पर भै गेलोँ छै तोँर

एक सन्नाटा उदासी छै परोसलोँ शांत  
गूँजै छै जों, खड़खड़ाहट सेँ समुच्चे प्रांत

हलहलाबै एक अभियो पर बरो रोँ गाछ  
दूर सबसेँ, रीतु पतझर केँ नचैतेँ नाच

जोँड़ निकली केँ तना सेँ भै गेलोँ छै तोर  
के उजाड़े ? देखथेँ लागै हवा केँ जोर  
सब जगह के पंछी आबी केँ लेलेँ छै ठाँव  
गूँजी रहलोँ छै टी-वी-टू, कुहू आरो काँव

ताही नीचेँ बैठलोँ गेनां निरासै टूँठ  
सोचै, सचमुच जिन्दगी की व्यर्थ ? बिल्कुल झूठ ?  
बाँचै रही-रही पत्र झुनिया रोँ; ऐलोँ छै आज  
एक आखर पढ़थेँ जेकरोँ छै गिराबै गाज

छै लिखै कि 'बड़का बाबू, की लिखीँ सब हाल  
खाट पर पड़लोँ होलोँ छै माय रोँ कंकाल  
आठ बरसोँ रोँ समय रोँ आबी गेलै अंत  
बीच मेँ आबी केँ कहियो भी नै लेलौ तंत

“तोँ कमाबै मेँ सभै लेँ छौ वहाँ मशगूल  
माय रोँ मूँ पर यहाँ उड़तेँ रहै छै धूल  
की पता तोरा वहाँ छौँ, बीसी रोँ सब हाल  
अबकि अगहन खेत मेँ कत्तेँ रहै बेहाल

“एक दिन पड़लोँ छेलै भादो फिरू सब शांत  
पड़लै की ! कानलोँ छेलै देखी धधकलोँ प्रांत  
कौआ-कुत्ता कानतै रहलै अघन के बाद  
देह दै-दै खेत केँ लोगेँ बनाबै खाद

“लोग दाना लेँ मरै छै, गिद्ध रोँ छै मौज  
आठ बत्तिस रोँ कन्हा पर गुजरै एक दिन ? रोज

हर कहो जी ! हर कहो जी ! राम ही एक सत्त  
गूँजे सद्धोखिन, घुमै छै मिरतु निर्भय-मत्त

“छोँ दिनों रोँ भुखली रधिया के भेलै कल मौत  
भाग्य सबके साथ घूमै छै बनी केँ सौत

“जखनी रधियाँ दम तोड़लकै तखनी ओकरोँ माय  
की तरह सेँ छाती पीटै, रुदन करतें हाय  
जों कबूतर लोटनी ही; आँखी में लै लोर  
कै दिनों तक रात-संझा आरो करतें भोर

“आखिरी में भूख नेँ मय्यो रोँ लेलकै जान  
रधिया पहिनें; माय पीछू सेँ गेलै श्मशान’

‘लोग दुबड़ी-घास नोची केँ मिटाबै भूख  
गांग सेँ ज्यादा पवित्तर होय गेलोँ छै थूक

आबेँ पतझर जे भेलै, पत्ती नै; केन्हों हाल  
बुतरूओ थोथोँ मुँहोँ सेँ छै चबाबै छाल

“छाल बिन केन्हों लगै छै गाछ ! सब रोँ धोँड़  
आदमी हपकी गेलोँ छै नीम तक के जोँड़

“घर रोँ पिछुवाड़ी में तोहरे ही लगैलोँ बेल  
जै पेँ झुलवा तोंय लगाय हमरा खेलाबौ खेल  
आरो पत्ता केँ चढ़ाबोँ शिव केँ भोरे-भोर  
छाती फटतीं देखी केँ रुकतीं जरो नै लोर

“छाल ओकरे नी उबाली कटलै दिन तें रात  
आबेँ ऊ भी नै दिखै छै; मृत्यु लै छै घात

हमरा की ? हममें तेँ लै छी माँटियो भी खाय  
भूख सेँ बनलौं बिछौना खाट पर छै माय !

‘आखिरी ये वक्ति जेनों लै हमेशे साँस  
चाहै छै बोलेँ लेँ कुछ; गल्ला मेँ फसलौं फाँस

‘आँख खोलै, खुल्ले ही घन्टो रहै छै आँख  
भूलो सेँ नै बन्द होय छै पलक रोँ दू पाँख  
बन्द होय छै तेँ जेना खुलबे नै करतै हाय  
बड़का बाबू, आबेँ नै बचती लगै छै माय

‘सनसनाठी रँ भेलौं छै गोड़ आरो हाथ  
ठीक सेँ साँसो कि जेना दै नै ओकरोँ साथ  
खुल्ला आँखी मेँ जलै श्मशान जेना हाय  
बड़का बाबू, आबेँ नै बचती लगै छै माय’

पढ़ी-पढ़ी फाटे चित्त कपड़ा घुनैलोँ रँ  
लोर ढरै गेना रोँ आँखी सेँ गिरै टपटप

जेकरा कि मूड़ी दायौं-बायौं करी पोछी लै छै  
बाँही सेँ । नै देखेँ कोय यही लेली झबझब  
मोँन करै बच्चे रँ भोक्कार पारी कानौ पर  
रहै छै दोनों ही ठोर खाली करी कपकप  
हुमड़े छै बन्द मूँ मेँ कानबोँ गेना रोँ आरो  
आँखी मेँ दिखाबै लोरोँ केरोँ मोती दपदप ।

कानोँ मेँ गूँजै छै बात केकरोँ ई घुरी-घुरी  
झुनियाँ रोँ बाबू छेकेँ कानी-कानी बोलै छै

‘तोहें डोलोँ शहरोँ के शान-शौक-मौजे में ही  
मरै तुल झुनियाँ रोँ माय हुन्ने डोलै छै  
बड़ोँ-बड़ोँ बात करै छेलौ, मरै तुल छेलाँ  
आदमी तेँ सूने में ही मोँन-धोँन खोलै छै  
आय जत्तेँ झुनियाँ रोँ दुख सेँ दुखित नै छी  
तोहरोँ विचार कहीं ज्यादा मोँन झोलै छै ।

दागी देलेँ रहेँ देह छोड़ धीपलोँ सेँ जेना  
जेना छेदी देलेँ रहेँ आर-पार तीरोँ सेँ  
धीपी कनपट्टी गेलै—लाल-लाल लोहोँ लाल  
रहेँ पारलै नै गेना तनियो टा थीरोँ सेँ  
घामोँ सेँ नहैलै हेने; जेना, सुनी-सुनी बात  
कानै छै दुखित होय सौसे ही शरीरोँ सेँ  
चिन्ता, असगुन, याद, सोच सेँ बन्हैलै हेनोँ  
जेना हिरनौटा बंधेँ हाथी के जंजीरोँ सेँ ।

घूमै छै आँखी में फगदोल झुनियाँ रोँ माय के  
‘राम नाम सत्त है’ गूँजे छै दोनो कानोँ में  
गेना आगू-आगू फगदोल पीछू लोग सब  
रही-रही घूमै छै दिरिश यही ध्यानोँ में  
छाती पीटी-पीटी हकरै छै, लोटै, माथोँ चूरै  
झुनियाँ कानै छै; जेना, भाला गाँधै जानोँ में  
हेनोँ कुम्हलाय गेलै गेना रोँ बदन सौसे  
जेना कि गहन लागी गेलोँ रहेँ चानोँ में ।

उठै-गिरै, गिरै-उठै मनोँ में विचार फेरू  
देखै छै कि झुनियाँ रोँ माय आँख मीचै छै  
‘मरतै की जीते जी ही हमरोँ ?’ ई सोचथै ही  
लागै जित्तोँ गेना रोँ ही खाल कोय खीचै छै

ई नै होतै ! ई नै होतै ! केन्हों केँ भी ई नै होतै !  
पूरा ई विश्वास साथ गेना साँस घीचै छै  
बहै छै आँखी सेँ लोर आकि जमलोँ होलोँ केँ  
जानी केँ बेकार, बेसी, आँखी सेँ उलीचै छै ।

एक बार झोली सौंसे देह केँ सजग भेलै  
आँख मीची कस्सी केँ निहारै फेरु चारो दिश  
मुट्ठी बान्है, मनोँ मेँ विचार करै कत्तेँ-कत्तेँ  
चलै छै अभीयो वही अन्धड़-पानी केँ ढीस  
थमै छै मनोँ रोँ हौलदिल आबेँ; जेना, साँप  
मार खाय लोटै, झाड़ै आखरी समय रोँ रीस  
मुँहोँ पेँ चमक आबी गेलै खिली गेलै मोँन  
जली-जली राख भेलै, गेलै कुम्हलाय टीस ।

घूरै छै आँखी मेँ सौंसे गाँव, घोँर, लोग, जोँन  
देखै छै गेना कि जेना सब्भे दिश दौड़ै छै  
केकरो जाँतै छै गोड़, केकरो दबाबै देह  
केकरो लेँ कंद-मूल वनोँ मेँ जाय तोड़ै छै  
केकरो खिलाबै छै, पिलाबै छै दबाय-दारु  
सब्भै सेँ ही नेहोँ रोँ सम्बन्ध दौड़ी जोड़ै छै  
छोड़ै छै नै जात, परजात, पोँर-परिजन  
जेना झुनियाँ रोँ रोगी माय केँ नै छोड़ै छै ।

देखै छै कि भूखोँ सेँ भुखैलोँ लोग हेनोँ लागै  
जेना कोय बच्चा नेँ बनैलेँ रहेँ तस्वीर  
हाथ गोड़ लम्बा-लम्बा, डगमग, पेट आरो  
पीठी रोँ पता नै रहेँ; अँगुरी जोँ रहेँ तीर  
आँख रहेँ खोड़र ही, डीम; जेना, जीभ रहेँ  
देखी केँ भौआय गेलै, गेना भै गेलै अधीर

सोचै छै ई आदमी रोँ हाथ, गोड़, देह छेकै ?  
काठी खासी-खोसी गढ़ी देलेँ छै सौँसे शरीर ।

देखै छै गेना कि गेना दौड़ी-दौड़ी पानी लानै  
छानी लानै, चुरू-चुरू प्यासला पिलाबै छै  
माँगी लानै केकरौ सेँ बाजरा या मडुआ केँ  
आरो खतकाय वहेँ केकरो खिलाबै छै  
जड़ी केँ उखाड़ी लानै, केकरो बाँही पेँ बान्हे  
केकरो लेँ कूटी छानै, मोँद मेँ मिलाबै छै  
कालें नेँ मारी देलेँ छै जेकरा कि थोकची केँ  
ओकरौ भी गेना छूवी छनै मेँ जिलाबै छै ।

जेना मधुमास मेँ पलास वन लहकै छै  
शोभै छै सरंग पनसोखा रंग पाबी केँ  
माय-मोँन जेना भरी उठै मद-मोद सेँ छै  
फूल हेनोँ छाती मेँ सोना रोँ लाल पाबी केँ  
होन्हे गेना रोँ सेवा सेँ सब्भे छै सरस-सुखी  
ओकरोँ निस्वार्थ प्रेम, त्याग-धोँन पाबी केँ  
जेना परदेश मेँ खुशी सेँ कोय झूमी उठै  
आपनोँ देशोँ रोँ चैता, गोदना केँ गाबी केँ ।

देखै छै तबैलोँ ताँबा हेनोँ देह चमकै छै  
रूप; आग मेँ गलैलोँ चाँदी हेनोँ चमकै  
सब्भे रोँ मुँहोँ पेँ वही पुरबी छै, समदौन  
झूमर के बोल घुँघरूवे हेनोँ छमके  
सुनी-सुनी सोहर के सुर, सुन्दरी रोँ पाँव  
आगू नै बढै छै रुकी-रुकी जाय, ठमकै  
टोला-टोला मेँ चली रल्होँ छै वही गीत-नाद  
कानोँ मेँ गेना रोँ वही ढोल-झाल झमकै ।



आरो देखै छै गेना कि दौड़ी-दौड़ी लोगोँ पीछू  
गेना पड़ी गेलोँ छै बीमार बड़ी जोरोँ सेँ  
हाथ गोड़ झामे रँ झमैलोँ, कँपकँपी छूटे  
पटपरी पड़ी गेलोँ लहू चुवै ठोरोँ सेँ  
रसेँ-रसेँ ऐंठन उठै छै, उठले ही जाय  
दरद देहोँ मेँ फैलै उगी पोरोँ-पोरोँ सेँ  
तहियो छै सबरोँ सुखोँ सेँ सुखी, हा ! हा ! हाँसे  
बान्है; नै बन्हाबै आधि डायन के डोरोँ सेँ ।

## बसन्त-खण्ड

बहे छै हवा रेशमी गुदगुदाबै  
कली केँ दै किलकारी-चुटकी खिलाबै  
खिली गेलोँ फूलोँ केँ चूमै-हँसाबै  
बिना झूला के ही दै धक्का झुलाबै  
हिलाबै छै झोली केँ आमोँ रोँ ठारी  
कभी देखी आबै छै सरसों रोँ क्यारी  
छुवै फूल हौले बड़ी डरलोँ-डरलोँ  
कहीं हरदियानोँ रँ बिरनी ही अड़लोँ

डरी केँ उड़ै, तेँ ऊ तितली तक पहुँचै  
बड़ी गुदगुदोँ देह पाबी केँ हुमचै  
कहीं जोगबारिन रोँ आँचल केँ छूवी  
कभी ओकरोँ गालोँ रोँ गड्ढा मेँ डूबी  
बढ़ावै छै विरहा रोँ आगिन केँ आरू  
'पिया पंथ ऐसे मेँ कब तक निहारू'

वहाँ सेँ जाय पहुँचेँ छै आमोँ के वन मेँ  
कहाँ छै छनै मेँ, कहाँ फेनू छन मेँ  
कभी मंजरी के रस नीचेँ चुआबै  
कभी छेड़ी कोयल केँ हेन्धै चिढ़ाबै

घड़ी देर ठारी पर बैठी केँ झूलै  
ई देखी केँ गेना कदम्बे रँ फूलै

बड़ी देर सेँ देखी रहलोँ छै खेला  
मनारोँ के एंगन मेँ फागुन रोँ मेला  
जरा भी नै चिन्ता कि बीमारो ऊ छै  
तपै देह, साँसो बहै जेना लू छै  
उपासोँ सेँ लरपच रँ बत्ती छै भेलोँ  
बहै देखै-देखै मेँ कुव्वत कमैलोँ  
नै हाथोँ मेँ शक्ति, नै देहोँ मेँ ताकत  
हुएँ लागै छै साँसो लै मेँ भी धतपत

लगै झुरी, तांतोँ रोँ नोचलेँ रँ साड़ी  
की चारो तरफ सेँ छै काँटोँ रोँ बाड़ी  
उठै, तेँ ऊ पीपर रोँ पत्ता रँ डोलै  
बसन्ती हवौँ ओकरा बरियोँ रँ झोलै  
मतुर कुछ नै चिन्ता छै गेना केँ जरियो  
की सेवा सेँ सब्भे के कम ऊ छै बरियो

लुभाभै छै गेना केँ फूलोँ रोँ खिलबोँ  
लता-फूल दोनों रोँ लिपटी केँ मिलबोँ  
कहीं फूल गोरोँ, कहीं लाल रत-रत  
बहै छै हवा दक्खिनी चाल धतपत

कि झाँकै छै ठारी सेँ टूसा के पाँती  
उतारी केँ गल्ला सेँ जाड़ा रोँ गाँती  
कहीं फूल खिललोँ सेँ जीरी छै निकलै  
कहीं पीत पाखी एक गेना केँ दिखलै  
बड़ी शोख, चंचल; बसन्ती हवा रँ  
कि मरता पर जेना मकरध्वज दवा रँ

हिलाबै छै गरदन, कहै टी-वी टुट-टुट  
सुनी जेकरो बोली छै बेचैन झुरमुट

कि जन्ने भी गेना छै मूड़ी हिलाबै  
वहीं रास गोकुल रो सिमटै-सुहाबै  
सुहाबै गोबरधन रँ ठामे मनारो  
कि जै पर बसन्ते मचाबै धूम आरो  
बिछैलें छै फूलो रो कोने बिछौना  
कि के ऐतै ? फागुन में केकरो ई गौना  
किनारी-किनारी में पत्ता रो झालर  
की फूलो रँ मुखड़ा के नीचे में कालर

गिरै छै, बहै मोद फूलो से चूवी  
कि दोना लै घूमै छै भौरा के जोगी  
बजाबै छै मुँह से जे शृंगी सुरो से  
सुनी के ई तितली उड़ै छै डरो से  
सुगन्धित छै धरती की; सरंगो तक गमगम  
पन्नी रो धूप चमकै, ज्यादा न कमकम

निहारी-निहारी के गेना छै बेसुध  
मतैलो रँ लागै, हेरैलो रँ सुधबुध  
मने-मन विचारै छै बौसी ले गेना  
“सिरिष्ठी पर सजलो छै सरंगे ही जेना  
बड़ा धन्य हम्मै, यहाँ जन्म लेलौं  
कि मिट्टी रो ई तन ई मिट्टी पर पैलौं  
जहाँ देव-दानव भी आबै लें तरसै  
जहाँ मोक्ष हेनै के बरखा रँ बरसै  
जहाँ चीर, चानन, सुखनियाँ बहै छै  
किनारी-किनारी में पर्वत रहै छै

जे देखै में लागै छै; बौंसी ने मूड़ी  
बनैलो छै कत्ते नी ब्रह्मा से कूड़ी

“सुहाबै छै पाँती में पर्वत पर फूलों  
पिन्हैले छै गल्ला में माला की ? एहो  
कहीं कोन रँ के, कहीं कोन रँ के  
मिलै फूल ढूँढ़ो जहाँ जोन रँ के  
हवा जो छुवै छै ते अनचोके सिहरै  
नवेली दुल्हैनी के लट्टो रँ लहरै

“पहाड़ो के नीचे में चारो तरफ से  
सरोवर सुहाबै; गिरै मीन छप से  
वही बीच खिललो छै ढेरे कमल भी  
कमल पर टिकुलिये रँ भौरा रो दल भी  
बड़ी साफ-सुथरा दिखाबै पापहरणी  
कुमारियो के गालो से चिकनो, सुवर्णी  
सरोवर में पर्वत मनारो के छाँही  
की दूसरो कोय पर्वत छै पकड़ी के बाँही  
की उठलो छै धरती से आधो ही पर्वत”  
विचारो पर गेना रो पड़लो छै आफत

“पहाड़ो के माथा पर विष्णु रो मन्दिर  
वहीं से बही रहलो छै पानी झिर-झिर  
बुझाबै छै गंगा जटा शिव से निकली  
बही रहलो छै नीचे एकदम सम्हली  
की राधा ही चल्ली छै घेरों से निकली  
पिया के विरह में बड़ी खीन-दुबली  
बऔली छै पर्वत पर, पोखर में, वन में  
जरी रहलो आगिन छै सौंसे बदन में !

बजै छै पहाड़ों रों भीतर में बाजा  
महादेव के डमरू ? की मुरली में आ जा

बसन्तों के भारों सेँ धरती छै लदबद  
गिरै छै आकासों सेँ सुषमा की हदहद !  
कहै छै—कभी भारती वन जे छेलै  
वही आज आँखी में बरबक्ती हेले  
फिरु सेँ फुललै की मालूर कानन ?  
खुली गेलै केना केँ सुषमा रों बान्हन !”

बड़ी याद आबै छै गेना केँ ऊ सब  
“इस्कूली के पीछू सेँ निकली केँ झबझब  
यहीं आबै देखै लेँ फूलों पर तितली  
मतैली रसों सेँ, ओधैली रँ तितली  
कभी बाँसबिट्टी सेँ तोड़े बाँसबिट्टों  
झड़ाबै पहाड़ी लतामों केँ मीट्ठों”  
बड़ी याद आबै छै गेना केँ ऊ सब  
इस्कूली के पीछू सेँ निकली केँ झबझब

“ऊ भादों रों दिन में सुखनिया रों बोहों  
मिलै अच्छा-अच्छा केँ जै में नै थाहों  
कुदेँ-धौंस मारै ऊ हेना-में-हेना  
कि डौंड़ी में कूदै कोय बड़का ही जेना  
बहै नाव नाँखी । कभी तोँर हेनोँ ;  
मछलिये रँ । उपलै कभी सोँस जेहनोँ  
हँकाबै, मतुर के सुनै माय केरों  
खड़ा देखै टुक-टुक सब साथी के जेरोँ  
बड़ी याद आबै छै गेना केँ ऊ सब  
ऊ भादों के चानन में पानी रों लबलब

“ऊ आसिन में कासों रों फुलबों-फुलैबों  
इस्कूली से भागी वहीं में नुकैबों  
वहीं बैठी घरघोट खेला रों मंगल  
कभी जोड़िये में की कुस्ती रों दंगल

‘यही पापहरणी किनारी में अइयै  
गुलेलो से गोली की गनगन चल्यै  
कभी अट्ठागोटी, कभी नुक्काचोरी  
कभी घघो रानी, ते झुनझुन कटोरी  
कबड्डी में लँधी से हम्मं नै डरियै  
जरो सा नै खेलो में बेमानी करियै

“ऊ जेठों के लू खोललो, कड़कड़ैलो  
अभी ताँय नै भुललो छी देह पड़पड़ैलो  
“यही ठुठ्ठा पीपर रों गाछी तरो में  
नुकाय के रहौं; जबकि सब्भे घरों में  
यहाँ आबी साथी संग बकरी चरय्यै  
कभी दू के सींगे धरी के लड़य्यै  
अभी ताँय नै भुललो छी बकरी रों में-में  
ई पीपर रों ठारी पर सुग्गा के टें-टें

“ते ढकमोरलो कत्ते रहै तखनी पीपर  
बसन्ते से अखनी छै कुछ पत्ता जै पर  
यहीं आबी शुकरां की छोड़ै उदासी  
यही ठहरै सब्भे सवासिन पियासी  
दुलारी रों डोली यहीं रुकलो छेलै  
अभी भी ऊ सूरत ई आँखी में हेलै  
जमुनिया रँ । पानी में केकरौ से ऊपर  
सुशीलो-सुभावो में सब्भे से सुन्नर

भरी दिन अकेली यही खिलखिलाबै  
कभी बेर, जामुन के तोड़े-झड़ाबै  
कभी हेन्हें ढेपो सरोवर में मारै  
कभी पापहरणी में मूँ के निहारै  
गुँजाबै पहाड़ों के बोली 'दुलारी'  
पहाड़ो भी बोलै वही रँ 'दुलारी'

“बसन्तो सेँ मोजरै जे आमो रोँ ठारी  
टिकोलौं बुलाबै पुकारी-पुकारी  
लगाबै बिछी जे टिकोला के कूरी  
कभी फेनू ऐलै नै नैहर ऊ घूरी

“दुलारी रोँ डोली यही रुकलो छेलै  
अभी भी ऊ सूरत ई आँखी में हेलै  
बड़ी कपसी-कपसी केँ डोली सेँ झाँकी  
ई छाती में सुइया सौ गेलो छै गाँधी

“कहै छेलै—जामुन रोँ गाछी में राती  
जरै छै बिलारो रोँ आँखी रँ बाती  
डरो सेँ नै हिन्ने तेँ कोय्यो भी आबै  
दुपहरियाँ भी आबै में बड़का भोआबै  
दुलारी के गेला पर हम्में अकेलो  
यही आबी राती की खोजियै ? हेरैलो

भरी दिन दुलारी रोँ यादो में गुमसुम  
कभी अपनो ऐड़ी रँग्यै मतरसुन  
हँक्यै, बुलैय्यै बताहा रँ केकरा  
की सोची केँ करियै हर चीजो में बखरा  
कभी तोड़ी लय्यै पलाशो रोँ झुक्का  
मतुर होश ऐला पर सपना सब फुक्का”



भरी ऐलै गना रोँ आँखी में आँसू  
बड़ी पीर चोखोँ, बड़ी पीर धाँसू

“बहैलों छै अय्यो बसन्तोँ रोँ बोहोँ  
गिरै छै अकाशोँ सेँ सुषमा की होँ-होँ  
करै मोँन कोयल रोँ बोली में बोली  
चिढ़ाबौँ भरी दम; अघैलोँ, जी खोली

“पलाशोँ रोँ फुल्लोँ छै की फूल पावन !  
हथेली रँगैलोँ ? की लट्ठी रोँ कंगन ?  
की कानी केँ भेलोँ छै आँखे ही रत-रत  
बड़ी लाल; प्यारी दुलारी के ? की सत ?

“करै मोँन सबटा पलाशे लै आनीं  
जों बच्चा में; होनै केँ बालू केँ खानीं  
बनाबौँ वही में बड़ा घोर सुन्नर  
सजाबौँ दुआरी सेँ देहरी लै छप्पर”

निहारै छै गेना पलाशोँ केँ टक-टक  
कभी प्राण हुलसै कभी प्राण हक-हक

थकी रहलै कोयल पुकारी-पुकारी  
'कुहू तों कहाँ छोँ 'दुलारी' दुलारो ?'  
सुनी केँ बड़ी प्राण गेना रोँ हहरै  
कलेजा कलेजा तक केन्हौँ नै ठहरै

तभी बोली केकरो सुनी केँ संभल्लै  
पुजारी केँ ऐतेँ देखी केँ बदललै

कहाँ सेँ बुझैलै हौ ताकत बदन में  
उठी केँ झुकी गेलै हुनकोँ चरन में  
भरी गेलै भावोँ सेँ; गदगद भै गेलै  
पुजारी रोँ आँखी में गंगा समैलै  
उठै छै हृदय में ऊ ममता के धूनी  
भरी पाँजोँ गेना केँ लै लेलकै हुनी  
समैलै आकाशोँ में; जेनां हिमालै  
समय दुख केँ हलकोरी चलनी सेँ चालै

गिरै छै पुजारी रोँ आँसू पीठी पर  
भिंजै छै मतुर गेना भीतर-ही-भीतर  
कहाँ गेलै हौ रँ बीमारी के आगिन  
कहाँ गेलै उस्सठ रँ जिनगी रोँ धामिन  
बुझाबै छै गेना केँ हेनोँ; नसोँ में  
बहै नै लहू; जेनां, चन्दन-रसोँ में  
कड़क मारी बिजली कोय देहोँ में फैलै  
शरीरोँ में सृष्टि के सुषमा समैलै  
बुझाबै पुजारी रोँ बोली भ्रमर रँ  
लहर मारै गेना रोँ सौँसे ठो अंग-अंग

“सुनी केँ बीमारी के बेचैन भेलौं  
खँड़ामो नै पिन्हलौं कि झबझब छी ऐलौं  
खबर फैली गेलोँ छै बोहोँ रँ एकोँ  
सुनी केँ ई फाटै छै छाती नै केकोँ !  
सुफल करलौ जिनगी मनुक्खोँ रोँ ।आशीष !  
कि तोरे ही जय-जय विराजै सभै दिश  
यही धर्म देवोँ रोँ, मानव रोँ, सबके  
कही गेलै हमरोँ सब पुरखें । आय ? कब के

“यही धर्मवाला महाकाल रों भी  
 सरो पर चढ़ी हाँसे—‘दुनियाँ रों सेवी’  
 करी गेलौ कलयुग के तोहें छौ फीका  
 सुहाबौ ललाटो पर विजयी रों टीका  
 प्रभापूर्ण करलो छौ सौंसे जगत के  
 कनक में मणि कूटी आरो रजत के  
 कभी की प्रभा ई खतम होतै-जैतै  
 यही पर चढ़ी फेनू सतयुग नी ऐतै  
 समाजो रों, सब्भे रों सेवा जे करलौ  
 बनी के तों विषहर जे विषधर के हरलौ  
 सिखैले छौ मानव के मानव रों करतब  
 वहे देखौ चललो सब आबै छै झब-झब”

बढ़ी रहलो फूलो के बोहो रँ जन छै  
 शरद-चान हेनो ही गेना मगन छै  
 बहै छै पवन प्रेम रों मन में हू-हू  
 उठी गेलै दोनों ही अनचोके बाहू  
 उड़ी रहलो अम्बर तक फूलो रों रंग छै  
 अजब आय धरती रों दुल्हन के ढंग छै

खिली गेलै गेना रों सौंसे बदन में  
 करोड़ों कमल कखनी, केना के क्षण में !  
 खुली गेलो मुन्हन छै अमरित कलश रों  
 चलै झटकवा चारो दिश से छै रस रों  
 कि बरसो नै बरसै छै है रँ के हद-हद  
 भिंगी गेलो गेना छै अनहद तांय सरगद  
 कुहू रों मचै शोर मन रों वनो में  
 पिकी के, भ्रमर के रव, एक्के क्षणो में  
 बजाबै छै कौने ई वीणा के गाबी  
 अभी राग दीपक ते मल्हार आभी ?

सुनै, बंद कोषों में भौरा रँ, गेना  
कन्हैया रो वंशी के राधा ही जेनां  
दिखाबै छै दुख-दाख कन्हों नै काँही !  
बहारो के सुषमा सब मन के ही छाँहीं !

### (हरगीतिका छन्द)

अजगुत दिरिश सब लोग देखै आय की ई रही-रही  
झूमै लता-फल-फूल-कोढ़ी बांही सब रोँ गही-गही  
एक असकललोँ विरिछ पर अरबौँ फुललौ छै फूल-फल  
मकरन्द सनलो भौरा लागै, सूर्य । खिललौँ, नभ, कमल

ढेरे किसिम के नीड़ सेँ शावक चिरै के हेरै छै  
बीजू वनों सेँ पी-कहाँ के टेर पपिहो टैरै छै  
की रँ उमड़लौँ खसलौँ छै ई भीड़ देखबैय्या केरौँ  
गिरि-वन केँ लाँघी-लाँघी कम्मोँ छै की लंघबय्या केरौँ

सधरोँ सब केँ भी फानलेँ नँगचावै जे; ऊ आय की ?  
देखै जों बाधा-विपद, मारै रोर छै । अनठाय की ?  
सब डैन-जोगिन देखी ई सब डरहै सेँ थर-थर करै  
कृश काय गेना केरौँ निरखी लोर आँखी सेँ झरै

लेकिन दुखोँ रोँ कोय छाया गेना मुख पर नै दिखै  
जेना दिखै छै शांत गेना; भाग सब रोँ विधि लिखै  
सब लोग खाड़ोँ भक्ति भरी-भरी सब्भे रही-रही जै करै  
गेना कहै, “सब लोग मिली-जुली सृष्टि मंगलमय करै”

## (गीतिका छन्द)

“सब हँसेँ दुसरौ केँ हक दौ—खिलखिलाबेँ, ऊ हँसेँ  
सब हुँएँ ठाढ़े, जों दुष्टेँ एक केँ भूलो डँसेँ  
जे जहाँ छै सब बरोबर; पशु हुँएँ या नर-त्रिया  
देवता या दनुज जों कोय छै तेँ बस लै केँ क्रिया

“ऊ जे लोभेँ या डरोँ सेँ सच नै बोलै, गुम रहै  
आकि स्वारथवश ही खल केँ साथ दै, ओकरे कहै  
जे कि समता-समता कही-कही बस विषमता बाँचेँ छै  
जे प्रवंचक, आत्मछलि जे, ऊ की जन केँ जाँचेँ छै

“भेद-बुद्धि बढ़ला सेँ छै भेदो, कल्होँ-कचकचोँ  
तोंय तरत्थी केँ रँगोँ आगिन सेँ नै । मेंहदी रचोँ  
स्वर्गोँ सेँ सुन्नर भुवन ई; वेदो तक है गाबै छै  
हम्मी नै पुरखोँ पुरातन युग सेँ कहलेँ आबै छै

“आपनोँ माँटी लेँ, जन लेँ, जान-जी सब धूले रँ  
एतनै नेँ, सौँसे भुवन रोँ लोग लागेँ फूले रँ  
आरो जे सौदा करै ई फूल रोँ; दुश्मन वही  
जे सँहारेँ हेनोँ दुश्मन—नर वही, पावन वही

“मनुष-सेवा से बड़ी के धरमो नै, दरशन नै छै की ? कहाँ छै धर्म-दर्शन ? देवतों ? जों जन नै छै आदमी अमृत-विभासुत, देवता कलि कल्प रो आदमी जागे ते की तक्षक ? की गेहुअन ? अधसरो ?

“आदमी रो मैल धोवे—धरम ई गंगा हुएँ ठेलो नै नर के नरक मेँ; स्वर्ग के आबे छुएँ आदमी छै पहले तभिये धर्म रो खाता-बही जों मनुष हो जाय एक ते धर्म दू रहतै ई की ?

“जों मिलै मेँ धर्म बाधा; धरम की ? ई जात की ? जे मनुष मानै छै सब मेँ भेद के—ऊ पातकी देवते नी आदमी रो रूप धरी-धरी आबै छै आरो नर रो दुश्मनो के देवतौ नै भावै छै

“पाप रो व्यापार-सौदा सब क्षणिक छै, बुलबुला आदमी छोड़े नै श्रम के, न्याय छै हाकिम तुला शुद्ध ज्ञानों से, धरम से, राजा रो चित शुद्ध से ई सिरिष्टी बनतै फेनू स्वर्ग नानक-बुद्ध से”

ई कही चुप भेलै गेना; स्वर मतुर सगरो फिरै वायु रो चंचल लहर पर वाणी रो हंसनी तिरै जेनो कि मणि-खंभ पर माणिक जड़ित, छै सब रो मुख दुख हटी गेलो छै सबसे भीगै पोरे पोरे सुख सब रो बीचो मेँ होनै के आय गेना शोभै छै झीर-नद-मंदार, गंग-अजगैवी जेनो भाबै छै ।

